



Stručna služba općinskog vijeća i općinskog načelnika

Broj: 01/1-02-376/19

**PRIJEDLOG**

Ilijaš, 26.02.2019. godine

**Z A P I S N I K**

sa 28. (dvadesetosme) sjednice Općinskog vijeća Ilijaš, održane dana 26.02.2019. godine, sa početkom u 10:00h.

Dvadesetosmom sjednicom Općinskog vijeća Ilijaš predsjedavala je predsjedavajuća Općinskog vijeća Ilijaš g-đa Alma Omerović.

Prisutni vijećnici:

<b>RB.</b>	<b>IME I PREZIME</b>
	<b>SDA</b>
1	ŠEHERZADA ĆOSIĆ
2	ANEL BUMBULOVIĆ
3	VEHID HALILOVIĆ
4	ALMA OMEROVIĆ
5	MEHMED SINANOVIĆ
6	ADEM ALIĆ
7	FAHIR HASANOVIĆ
8	-
9	SEMIR DEDIĆ
10	HALID DIZDAREVIĆ
11	RASIM ŠEHIĆ
12	-
13	ALEN HASKOVIĆ
14	SEAD ŠEHIĆ
	<b>SDP</b>
15	ALAN ŠERAK
16	-
17	MIRSAD OSMANOVIĆ
	<b>SBB-FAHRUDIN RADONČIĆ</b>
18	AKIF BEŠLIJA
	<b>BPS-SEFER HALILOVIĆ</b>
19	MUHAMED HANDŽIĆ
20	ALMIR ŠPIODIĆ
	<b>GS</b>
21	EDHEM HASANOVIĆ
22	-
	<b>SAMOSTALNI VIJEĆNICI</b>
23	SEMIR DIZDAREVIĆ
24	-
	<b>LDS</b>
25	MEHO DŽINDO

Odsutni vijećnici:

1. Mirza Bektić
2. Melisa Matoruga
3. Eldar Šehić
4. Asim Mujić i
5. Besim Gljiva

Prisutni gosti:

1. TV Vogošća
2. Radio Ilijaš- Aida Muratović
3. Mehmed Smajlović – predsjednik savjeta MZ Mrakovo
4. Mirsad Hamzić – predsjednik Savjeta MZ Malešići
5. Irfan Nefić – komandir PS Ilijaš
6. Volonteri: Nedim Balta i Ehlimana Fazlić

Ostali prisutni:

1. Akif Fazlić – općinski načelnik
2. Sadeta Brkić – pomoćnik načelnika
3. Nijaz Spahić – pomoćnik načelnika
4. Zdravko Barić – pomoćnik načelnika
5. Aziz Fazlić – pomoćnik načelnika
6. Merima Osmanović – pomoćnik načelnika
7. Sanja Zagorac-Jozić – pomoćnik načelnika
8. Ilda Kahrman – sekretar OV-a Ilijaš
9. Nermina Lemezan - stručni saradnik za informacije
10. Đenan Suša – IT administrator
11. Maida Habibović – zapisničar.

ALMA OMEROVIĆ – predsjedavajuća

Otvorila je sjednicu i konstatovala da je prisutno 20 vijećnika, te da postoji kvorum za odlučivanje.

Zatim je pročitala pozivnicu Kantona Sarajevo, a vezano za obilježavanje Dana nezavisnosti BiH.

“Program je slijedeći:

Petak, 01.03.2019. godine

- |            |  |
|------------|--|
| 09:00 sati | Mezarje Kovači-Odavanje počasti i polaganje cvijeća Bosanskom Šehidu i na mezaru Prvom predsjedniku Republike BiH, gosp.Aliji Izetbegoviću       |
| 09:30 sati | Spomen obilježje Vječna vatra - Odavanje počasti i polaganje cvijeća   |
| 10:00 sati | Spomen obilježje ubijenoj djeci opkoljenog Sarajeva 1992-1995 – Odavanje počasti i polaganje cvijeća   |
| 10:15 sati | Spomen obilježje ubijenim policajcima u Velikom parku (preko puta BBI centra) – odavanje počasti i polaganje cvijeća (Delegacija grada Sarajeva) |
| 10:30 sati | Spomen park Vraca – Odavanje počasti i polaganje cvijeća   |
| 19:00 sati | Zajednička svečana akademija u Vijećnici   |

Na polaganje cvijeća su pozvani: članovi Predsjedništva BiH, čelnici oba doma Parlamentarne skupštine BiH i Vijeća ministara BiH, čelnici oba doma Parlamenta Federacije BiH, predsjednik i potpredsjednici Federacije BiH, članovi Vlade Federacije BiH, funkcioneri Skupštine i Vlade Kantona Sarajevo, čelnici Gradskog vijeća i gradske uprave Sarajeva, općinskih vijeća i općina, kao i boračke i druge nevladine organizacije. Svi navedeni su pozvani i na Zajedničku svečanu akademiju koju organizuje Kanton Sarajevo, Grad Sarajevo, sve općine sa teritorije Kantona Sarajevo i Forum parlamentaraca BiH 1990.

Pozivamo Vas kao suorganizatora obilježavanja 1.marta – Dana nezavisnosti BiH da prisustvujete odavanju počasti i polaganju cvijeća prema Programu i prisustvujete Akademiji.

Molimo da nam potvrdite Vaše učešće na polaganju cvijeća, odnosno dolazak na Akademiju, najkasnije u četvrtak, 28.02.2019. godine.

Zbog velikog broja zvanica i ograničenog broja mjesta u Vijećnici nismo u mogućnosti pozvati sve vijećnike svih općina, pa Vas molimo da pozovete do 5 vijećnika”.

Predložila je da se na kraju sjednice OV-a odredi pet vijećnika koji će prisustvovati na obilježavanju Dana nezavisnosti BiH.

Zatim je dala na razmatranje zapisnik sa 27. sjednice OV-a.

Primjedbi na zapisnik nije bilo, pa je OV-e jednoglasno usvojilo zapisnik sa 27. sjednice OV-a.

Pročitala je predloženi dnevni red.

**AKIF FAZLIĆ – općinski načelnik**

Predložio je da se tačka 12. Informacija o stanju kriminaliteta, javnog reda i mira i saobraćaja na području općine Ilijaš za 2018. godinu razmatra pod tačkom 3. obzirom da izvijestilac tj. komandir PS Ilijaš ima neodložnih obaveza u Sarajevu i da se tačka 9. Prijedlog Odluke o poništenju Odluke Općinskog vijeća Ilijaš broj:01/1-02-947-5/18 od 26.04.2018. godine razmatra pod tačkom 8., a tačka 8. Prijedlog Odluke o načinu i uslovima prodaje neizgrađenog građevinskog zemljišta postaje tačka 9. odnosno:

- tačka 3. Informacija o stanju kriminaliteta, javnog reda i mira i saobraćaja na području općine Ilijaš za 2018. godinu
- tačka 9. Prijedlog Odluke o poništenju Odluke Općinskog vijeća Ilijaš broj:01/1-02-947-5/18 od 26.04.2018. godine
- tačka 10. Prijedlog Odluke o načinu i uslovima prodaje neizgrađenog građevinskog zemljišta

**ALAN ŠERAK – vijećnik SDP-a**

I ja sam htio predložiti da se Informacija o stanju kriminaliteta, javnog reda i mira i saobraćaja na području općine Ilijaš za 2018. godinu razmatra na početku sjednicu, a inače to trebamo ubuduće praktikovati.

Primjedbi nije bilo, pa je OV-e jednoglasno usvojilo slijedeći

## **DNEVNI RED**

### **1. Vijećnička pitanja i inicijative**

2. Izvještaj o realizaciji zaključaka sa 27. sjednice
3. Informacija o stanju kriminaliteta, javnog reda i mira i saobraćaja na području općine Ilijaš za 2018. godinu
4. Izvještaj o radu općinskog načelnika i službi općine Ilijaš za 2018. godinu
5. Operativni plan općinskog načelnika i službi općine Ilijaš za 2019. godinu
6. Izvještaj o izvršenju Budžeta općine Ilijaš za period 01.01.2018.-31.12.2018. godine
7. Prijedlog Odluke o kreditnom zaduženju za izgradnju Gradskog stadiona Ilijaš sa pratećim sadržajima
8. Prijedlog Odluke o dodjeli na upravljanje i korištenje sistema za video nadzor gradskog područja općine Ilijaš
9. Prijedlog Odluke o poništenju Odluke Općinskog vijeća Ilijaš broj 01/1-02-947-5/18 od 26.04.2018. godine
10. Prijedlog Odluke o načinu i uslovima prodaje neizgrađenog građevinskog zemljišta
11. Prijedlog Rješenja iz imovinsko-pravne oblasti broj:06/1-31-248/19
12. Prijedlog Zaključka kojim se odobravaju novčana sredstva u iznosu od 30.000,00 KM na ime pomoći licima koja se nađu u stanju socijalne potrebe, a svoja prava ne mogu ostvariti putem Službe socijalne zaštite općine Ilijaš

AD-1

Vijećnička pitanja i inicijative

ALMIR ŠPIODIĆ – vijećnik BPS-Sefer Halilović

Pitanja:

1. Ko će snositi odgovornost ukoliko dođe do saobraćajne nezgode ili nesreće na pružnom prelazu "Alića rampa", jer projekat svjetlosne signalizacije nije u potpunosti riješen?

Semafori koji su prošle godine i zvanično pušteni u rad nemaju potpunu funkciju regulisanja drumskog i željezničkog saobraćaja na pružnom prelazu "Alića rampa". Ja sam na jednoj od prethodnih sjednica postavio slično pitanje Direkciji za ceste Kantona Sarajevo i Ministarstvu saobraćaja Kantona Sarajevo, ali nisam dobio odgovor.

Postojeći semafor zasigurno olakšava kretanje pješaka koji prelaze regionalnu cestu i to je opravdano sa te strane.

Ono što zbunjuje građane Ilijaša i mene lično jeste, da se dešava, da su rampe podignute, upaljeno zeleno svjetlo na semaforu, a u isto vrijeme prugom se kreće vozilo željeznica FBiH. Lično sam svjedok takvog događaja što dokazuje i ovaj foto zapis. Gospodo draga, potrošili ste preko četiri stotine hiljada maraka na ovaj projekat! Semafor ne reguliše ispravno saobraćaj što može dovesti do ozbiljnih saobraćajnih nezgoda opasnih po ljudske živote.

Pitam vas ko je odgovoran i ko će snositi odgovornost ukoliko dođe do udesa kada čovjek sa autom prođe na zeleno svjetlo i na pruži ga udari voz?

2. Ima li kompanija Telemach građevinsku dozvolu za postavljene stubove koji nose kablove putem kojih se prenosi signal TV i interneta?

Na području Mjesne zajednice Podlugovi na više mjesta u ul.Polomska, Vratuša i Sovrle nalaze se stubovi koji nose kablove preko kojih kompanija Telemach vrši usluge isporuke TV signala i interneta. Stubovi su postavljeni u samom putu i ugrožavaju kretanje učesnika u saobraćaju. Mene interesuje da li pomenuta kompanija ima odgovarajuće dozvole za

postavljanje objekata u putu? Ovo nije samo slučaj u Podlugovima, slična situacija je i u drugim mjesnim zajednicama. Ukoliko kompanija ne posjeduje odgovarajuće dozvole, predlažem nadležnoj općinskoj službi da pokrene postupak legalizacije s ciljem naplate korištenja javnog zemljišta ili uklanjanje objekata sa javne površine. Zavisno od odgovora koji dobijem, pokrenut ću i jednu inicijativu na sljedećoj sjednici Vijeća u vezi ovog pitanja.

Inicijativa:

Pokrećem inicijativu nadležnoj općinskoj službi i građevinskom inspektoru da izvrše nadzor i pritisak na izvođače radova koji su na više mjesta u užem jezgru grada Ilijaša izvršili prokopavanje javnih površina, a nisu iste vratili u prvobitni položaj. Radi se o ulicama Ivana Franje Jukića, putu prema Šipadovim zgradama i naselju Karašnica.

AKIF BEŠLIJA – vijećnik SBB-a

Inicijative:

1. Pokrećem inicijativu prema Komisiji za javna priznanja, obilježavanje historijskih događaja i ličnosti i zaštitu kulturnog i prirodnog naslijeđa da u saradnji sa nadležnom općinskom službom pokrene proceduru revidiranja Kalendara za obilježavanje značajnih datuma Općine Ilijaš.

Obrazloženje: Radi se o tome da se u postojećem kalendaru nalaze događaji koji se ne obilježavaju, a također u istom Kalendaru se ne nalaze događaji koji se obilježavaju, potrebno je da se izvrši revidiranje, te iz Kalendara izbrišu događaji koji se ne obilježavaju, a uvrste oni za koje postoji interesovanje, a ujedno se i obilježavaju.

2. Pokrećem inicijativu prema općinskom načelniku da se iznađe rješenje za trajno rješavanje prostorija za Udruženje "Budi mi drug" iz Ilijaša.

Obrazloženje: Radi se o tome da su prostorije koje koristi Udruženje "Budi mi drug" u vlasništvu JU "Djeca Sarajeva", te da imam informaciju da će pomenute prostorije Udruženje koristiti još naredne dvije godine. S tim u vezi, želim da se u tom periodu pokrene postupak trajnog rješavanja adekvatnih prostorija za ovo Udruženje. Pod tim mislim da se nađu prostorije koje će Udruženje koristiti za svoje potrebe bez strahovanja da im se ugovor o zakupu ne produži. Moje lično mišljenje je da bi najbolje rješenje bilo izgradnja kuće za djecu sa posebnim potrebama, uz sve prateće elemente koji su neophodni za ovakvu populaciju. Smatram da vremenski period od dvije godine dok traje ugovor je možda adekvatan period u kojem se može pokrenuti cjelokupna procedura, te izgraditi takve prostorije.

MEHO DŽINDO – vijećnik LDS-a

Pitanje:

Da li postoji mogućnost obezbjeđivanja finansijskih sredstava za završetak radova na Planinarskom domu Krivajevići koji koristi PD "Bijambare" Ilijaš?

Obrazloženje: PD "Bijambare" Ilijaš na svojoj izbornoj skupštini održanoj dana 23.02.2019. godine jednoglasno je usvojila Zaključak da se pokrene inicijativa prema Općini Ilijaš, vlasniku planinarskog doma, za obezbjeđenje finansijskih sredstava za dovršetak radova na ovom domu kako bi isti bio u funkciji u tekućoj 2019. godini. Svima je poznato da je

Općinsko vijeće Ilijaš donijelo Odluku o ustupanju doma PD "Bijambare" Ilijaš na period od petnaest godina. Odluka je donesena prije pet godina i za to vrijeme Odlukom je definisano da se dom u tom roku treba u potpunosti završiti sa svim potrebnim sadržajima kako bi služio svojoj namjeni. Prošle godine, u razgovoru sa načelnikom općine, predstavnicima UO PD "Bijambare" Ilijaš, obećano je da će rebalansom Budžeta biti planirano 60.000,00 KM tj. koliko je još potrebno za eksterijer i interijer u domu i oko doma. Prema projektnoj dokumentaciji, toliki iznos je neophodan da bi se dom u potpunosti završio (grijanje, namještaj, kuhinja i dr.). I ove godine je UO PD "Bijambare" Ilijaš aplicirao da se u budžet za 2019. godinu obezbjedi navedena sredstva za završetak radova. Ta sredstva nisu planirana i obezbjeđena, već je planiran iznos od 10.000,00 KM za dovršetak radova koja je investitor trebao uraditi. Zbog tih propusta na pojedinim dijelovima dom prokišnjava ne postavljanjem klupica na prozorima. A i bez toga, svima je poznato da kuća koja je prazna i u kojoj niko ne stanuje gubi na vrijednosti. Vrijednost ovog doma je znatno povećana dobrovoljnim radom planinara i zaljubljenika u prirodu. Nama je jasno da je Općina Ilijaš u ovoj godini planirala mnogo vrijednih investicionih projekata i ulaganja u ove projekte. Ali smatramo da se rebalansom Budžeta ili na neki drugi način mogu obezbijediti ova sredstva kako bi se planinarsko društvo samo finansiralo. Jasno vam je da je osnovni cilj svakog planinarskog društva, pa tako i PD "Bijambare", da vodi brigu o unapređenju i razvoju planinarstva, a posebno organizovanog boravka djece, omladine i građana u planini u svrhu planinarenja, a radi očuvanja zdravlja i razvijanja psihičkih i fizičkih predispozicija, sticanja znanja o značaju kretanja i boravka u planini, razvijanju osnovnog planinarsko-ekološkog obrazovanja, upoznavanju i čuvanju planinske prirode i kulturnih i historijskih znamenitosti. S tim u vezi, planinari PD "Bijambare" Ilijaš smatraju da ćete imati razumijevanja za ovu inicijativu i nadaju se povoljnom rješenju.

ALEN HASKOVIĆ – vijećnik SDA

Inicijativa:

Pokrećem inicijativu prema Direkciji za ceste Kantona Sarajevo i izvođaču koji vrši održavanje puta na dionici Čevljanovići-Gajevi da, čim se stvore uvjeti, izvrši sanaciju svih udarnih rupa na pomenutoj dionici na način da se iste asfaltira.

MUHAMED HANDŽIĆ – vijećnik BPS-Sefer Halilović

U protekla tri mjeseca provlačim ovo jedno pitanje, jedno upozorenje i mislim da je više došao kraj da to pitanje ide i u realizaciju. Naime, radi se o sljedećem. Moje kolege sam upozorio već tri mjeseca na Zakon o sukobu interesa. Upozorio sam na njihove dužnosti koje vrše da podnesu ostavke na neku od njih. Vjerovatno su se oglušili o to, a ja sam dobio i pismenu informaciju da su još na tim dužnostima, pa evo obećanje da ispunim prema građanima da ću pokrenuti pitanje, odnosno prijavu nadležnim organima da to u zakonskim okvirima riješe. Biću korektan i neću pominjati imena i prezimena mojih kolega, ali njihove funkcije moram.

Predsjednik ili predsjednica Udruženja šehidskih porodica je u sukobu interesa. Sve ovo što govorim, bio sam u Centralnoj izbornoj komisiji BiH sa ovlaštenom osobom provjerio da li se radi o sukobu interesa, pa tako i ovo ne bih napamet pričao.

Atletski klub Ilijaš, kao posrednik, moj kolega je u sukobu interesa, obzirom da je njegov bliži srodnik predsjednik kluba i ovlaštena osoba.

Bošnjačka zajednica kulture "Preporod" takođe, kolega je član tog.

Za sve vas imam i podatke da ste glasali za Budžet i za izvršenja Budžeta u proteklom

periodu, a niste smjeli. Dakle, upozoravao sam vas da to ne radite, ali vi ste se oglušili. Nadam se da ću i dalje imati jedan korektan odnos prema vama i nadam se da se nećete ljutiti na ovo sve što sam rekao i nećete se ljutiti na mene kada dobijete i određene sankcije zbog onog što ste činili u proteklom periodu, a to je otprilike okvirno od 1000,00-10.000,00 KM kazne i zabrana bavljenja svim političkim funkcijama naredne četiri godine. Pored toga, rekao sam da vas ima četvoro, ali jedan od kolega je na vrijeme podnio ostavku na tu funkciju, predao je udruženje nekoj drugoj osobi tako da on nije u sukobu interesa.

SEMIR DEDIĆ – vijećnik SDA

Pitanja:

1. Postavljam pitanje nadležnoj općinskoj službi šta je uradila povodom regulisanja autobusnog prevoza i prevoza učenika na našoj općini, uzimajući u obzir prijašnje vijećničke inicijative za navedeno? S tim u vezi, tražim da mi se za predmetnu javnu nabavku dostavi tenderska dokumentacija i izvještaj o realizaciji ugovora za navedenu nabavku. Izvještaj o realizaciji mora da sadrži jasno vidljive iznose mjesečnih faktura i naznake o plaćanju istih.
2. Postavljam pitanje nadležnoj općinskoj službi koje mjesne zajednice će naredne godine biti uključene u zimsko održavanje trotoara? Tražim da mi se dostavi tenderska dokumentacija za trenutni ugovor o zimskom čišćenju i održavanju puteva (zajedno sa trotoarima), te izvještaj o realizaciji ugovora koji mora da sadrži naloge, izvještaje o čišćenju (koliko često), koliko je fakturisano i koliko je plaćeno za isto.

ALAN ŠERAK – vijećnik SDP-a

Ovo što je maloprije kolega Handžić govorio, to stoji i to je tačno i znam za te stvari i pridružiti ću mu se i apelovati na vas da ne budete u sukobu interesa, jer budete sigurno da neće ostati "mrtvo slovo na papiru". Neko će se naći, poslije ovog Vijeća da pokrene te stvari. Mi, prije svega, trebamo da budemo primjer ovoj lokalnoj zajednici i ako već imamo nadležnosti i mandat da donosimo propise, onda prvo mi treba da budemo ti koji će poštovati propise ove države. Da se nalazite u sukobu interesa, nalazite se.

Ne znam da li sama današnja sjednica ima smisla iz razloga što smo konstatovali da smo na prošloj sjednici na neustavan način donijeli neustavnu odluku i usvojili nešto što nismo smjeli. O tome će svakako sud Federacije BiH dati konačnu riječ, a samo da vas informišem da je SDP zvanično i podnio apelaciju Ustavnom sudu FBiH. S druge strane, na prošloj sjednici Vijeća smo napravili jednu grubu proceduralnu grešku kojom je predsjedavao kolega Alen Hasković, a tiče se Prijedloga Odluke. Dakle, to je Odluka koja treba u konačnici da se usvoji i samim usvjanjem te Odluke se onda vrši korigovanje Poslovnika Općinskog vijeća Ilijaš. Mi to na prošloj sjednici nismo uradili, a imate u zapisniku na str.39 kako je išao tok sjednice. Izjašnjavali smo se o nekim amandmanima, pa su nam se čitali nekakvi amandmani, a ja govorio da iste trebamo dobiti na uvid, pa nam je kao rečeno da ćemo ih izglasati usmeno, a te ćemo nekako naknadno dobiti. Evo nemamo ih ni dan danas i mi stvarno ne znamo za šta smo glasali. Druga stvar, svi ti amandmani o kojima smo se izjašnjavali na prethodnoj sjednici su amandmani koji su sastavni dio Prijedloga o izmjenama i dopunama Poslovnika Općinskog vijeća Ilijaš. I nakon usvojenih amandmana u toj Odluci, onda se Odluka sa usvojenim amandmanima u cjelosti stavlja na glasanje i tim činom glasanja za tu Odluku

mi vršimo promjene Poslovnika o radu Općinskog vijeća Ilijaš. Mi to nismo uradili. Evo piše vam, str.39 zapisnika sa prošle sjednice koji smo maloprije jednoglasno usvojili. I onda se desi situacija koja se desila. Neko sebi uzme za pravo i potpiše takvu Odluku koju Vijeće nije donijelo i uputi je da se ista objavi u Službenim novinama. Sada da ja vas pitam. Jeste li svjesni šta ste vi zapravo uradili? Ovo su ozbiljne stvari sada. Uzeli ste sebi za pravo da potpišete nešto u ime Vijeća, a Vijeće to nije usvojilo. To što ste vi tada uradili ima itekako elemenata krivične odgovornosti i budite sigurni da će SDP to pokrenuti i jamčim vam lično da će stati iza toga. Dakle, četvrta tačka dnevnog reda se zove Prijedlog Odluke o izmjenama i dopunama Poslovnika Općinskog vijeća Ilijaš. Nije četvrta tačka bila amandman na član 14. Poslovnika o radu OV-a. To je nešto drugo. Vi ste nama "gurnuli" Odluku sa nekim izmjenama, "izrešetal" amandmanima tu Odluku i u konačnici ista nije stavljena na glasanje. To se tako radi. Govorim ovo jer ne znate te stvari, niste sposobni, niste dorasli ovoj stvari, ali ne, vi nećete mene da slušate i sve što ja ovdje pričam vi shvatate kao da ja nisam dobronamjeran. Itekako sam dobronamjeran, pogotovo kada se radi o procedurama. Hoćemo li danas nastaviti voditi sjednicu Vijeća i koji Poslovnik je važeći, ovaj što ste vi sebi uzeli za pravo, potpisali i poslali u Službene novine ili onaj stari koji je u biti ostao nepromijenjen? Mi, Odluku koju smo trebali izglasati, nismo izglasali, evo str.39. Prvo ćemo glasati za amandman, pa ovaj amandman, pa za onaj amandman i onda na sljedećoj stranici piše Prijedlog Odluke o dodjeli javnih priznanja, zaključili tačku i prešli na drugu. Je li tako bilo? Član 136. Poslovnika decidno navodi kako ta stvar funkcioniše. Samo treba uzeti i iščitati. Amandman se usvaja na Odluku, prijedlog amandmana, amandman se mora dostaviti u pisanom obliku, on ima svoju formu i oblik. Amandman vijećnici moraju da vide. Nakon usvajanja amandmana, Odluka sa izmjenjenim amandmanima se stavlja na glasanje. Mi to nismo uradili. Evo sada pitam šta da mi radimo danas?

ALEN HASKOVIĆ – vijećnik SDA

Dat ću određeni osvrt na komentar i diskusiju kolege Alana Šeraka. Na stranici 31. zapisnika sa 27. sjednice piše da ćemo se mi pojedinačno izjašnjavati za svaki član Odluke obzirom da Odluka koja je u prijedlogu nikada ne može biti kompletno usvojena, jer svi članovi možda neće dobiti potrebnu većinu vijećnika i ovdje piše da ćemo se za svaki član pojedinačno izjašnjavati što smo i učinili evo ako pogledate u nastavku zapisnika.

ALAN ŠERAK – vijećnik SDP-a (replika)

Kolega Haskoviću, nemoj sada pokušavati odbraniti neke stvari. Šta piše na 31. stranici zapisnika? Izjašnjavat ćemo se o svakom amandmanu pojedinačno. OK. Treba tako. U konačnici, Odluka se u kompletu usvaja. To se tako radi. Razumijem vas, prva vam je sjednica, prvi put ste se susretali sa amandmanima i ja to shvatam. Međutim, ne možete doći nespremni na Vijeće i voditi sjednicu. Procedure su tu da se poštuju. Ništa drugo. Dakle, mi zvanično nismo formalno-pravno izvršili izmjene Poslovnika o radu OV-a Ilijaš, a vi ste potpisali u ime Vijeća i poslali u Službene novine kao da jesmo.

MUHAMED HANDŽIĆ – vijećnik BPS-Sefer Halilović (replika)

U pitanju Alana Šeraka tražim odgovor od predsjedavajućeg OV-a po kojem Poslovniku ćemo mi danas raditi? Hoćemo li raditi po starom ili po novom Poslovniku, obzirom da novi Poslovnik još nismo dobili u pisanoj formi što je bila vaša obaveza da nam pošaljete



pismeno uz materijal za ovu sjednicu Vijeća ili elektronski putem e-maila da imamo na znanje Poslovnik koji ste, kao vi, usvojili na prošloj sjednici. Dakle, tražim odgovor po kojem Poslovniku ćemo mi danas raditi?

AKIF FAZLIĆ – općinski načelnik

Danas ćemo raditi po važećim odlukama i propisima koji su danas na snazi. Dakle, da li su ti propisi i te odluke donesene na validan način, da li su u skladu sa Zakonom ili Ustavom to je drugo pitanje i to pitanje se rješava pokretanjem ispitivanja zakonitosti i ustavnosti tih odluka, ali oni su na snazi. Ova država, ovaj entitet je deset godina radio po Zakonu o šumama koji nije bio ustavan, ali je Zakon bio na snazi. Dakle, i danas radimo po važećim zakonskim propisima tj. onim koji su objavljeni do današnjeg dana. Ako Odluka o izmjeni Poslovnika nije objavljena, ne možemo raditi po njoj, nego radimo po postojećem Poslovniku i odnosno svim drugim koji su objavljeni i koji su na snazi. Dakle, tu nema dileme. A da li cijenimo da neke odluke nisu uredu, pokreće se procedura ispitivanja zakonitosti ili ustavnosti naših odluka i kada meritorno tijelo kaže da one nisu zakonite tada te odluke postaju ništavne i stavljaju se van snage. To je potpuno jasno i nemojte da sada ulazimo u to “šta smo i kako smo”, a ko god cijeni da treba pokrenuti pitanje zakonitosti i ustavnosti neke odluke s aspekta procedure ili nekog merituma unutar te odluke uredu, ali ona danas važi. Dakle, Odluke koje god su objavljene, one danas važe.

ALAN ŠERAK – vijećnik SDP-a (replika)

Dakle, Odluka je objavljena i ona je “ko biva” na snazi. Suština moje priče je upravo išla u tom pravcu. Kako neko sebi može uzeti za pravo da potpiše nešto u ime Vijeća, a Vijeće nije donijelo tu Odluku? E to je suština. Ja razumijem načelnice da vi imate obavezu da pomognete ovoj mladoj ekipi ljudi i ja vas shvatam. Razumijem vas sa političkog aspekta i sa svakog drugog. Međutim, ovo sada vama govorim, ubuduće otvorite četvere oči i vodite računa kako vodite sjednicu OV-a. Ovo je tako proceduralno pogrešno urađeno. Rekao sam ti da ima elemenata krivične odgovornosti Haskoviću. U ime Vijeća ne smiješ potpisati nešto što Vijeće nije donijelo. Vodi računa o tome da li je Vijeće nešto usvojilo ili nije usvojilo. Ovo je ujedno apel i vama mlada damo, jer ja ću insistirati na tim stvarima i u to budite sigurni, pogotovo nakon neustavne Odluke da vas izaberemo.

MUHAMED HANDŽIĆ – vijećnik BPS-Sefer Halilović (replika)

Hoću da znam po kojem Poslovniku danas trebamo raditi? Ovo što je načelnik govorio, to je meni između redova i ja sam takvih odgovora dobio koliko god hoćete. Dakle, da li je važeći stari ili novi Poslovnik? Ako je novi, dajte mi ga, nisam ga dobio. Ako je stari, ja imam stari Poslovnik.

ALMA OMEROVIĆ – predsjedavajuća

Novi Poslovnik se upravo printa i dobit ćete ga u najbržem vremenskom roku i on je važeći.

HALID DIZDAREVIĆ – vijećnik SDA

Tražim da svi vijećnici dobiju novi Poslovnik, a ne samo kolega Handžić.

Pitanje:

Krajem 2018. godine sam pokrenuo inicijativu da se izvrši sanacija puta Nišići-Kamenica koji je u nadležnosti Direkcije za ceste Kantona Sarajevo. S tim u vezi, postavljam pitanje da li je pokrenuta sanacija planirana za 2019. godinu? Obzirom da se radi o uistinu neznatnim sredstvima kojim će se spriječiti dalje oštećenje puta, iskreno se nadam da se ova sanacija nalazi u planu Direkcije u narednom periodu.

AD-2

Izveštaj o realizaciji zaključaka sa 27. sjednice

Diskutanata po ovoj tački dnevnog reda nije bilo, pa je OV-e jednoglasno usvojilo

Izveštaj o realizaciji zaključaka sa 27. sjednice

AD-3

Informacija o stanju kriminaliteta, javnog reda i mira i saobraćaja na području općine Ilijaš za 2018. godinu

IRFAN NEFIĆ – komandir PS Ilijaš

Zahvaljujem se na pomjerenju ove tačke dnevnog reda, jer zaista imam neodložne obaveze u 12:00h u Sarajevu.

Što se tiče sigurnosti u jednoj zajednici i inače društveni pojam sigurnosti imamo najmanje dva shvatanja. Imamo percipiranje sigurnosti, odnosno osjećaj sigurnosti i imamo ono faktičko stanje kakvo jeste. Često se ocjene iznose bilo da imamo varijacija tu ili samo s jednog aspekta. Svima je jasno da je pitanje sigurnosti u ovom društvenom trenutku veoma važno pitanje. Ako nemamo sigurnosnu zajednicu, odnosno okolinu, a prije svega od porodice pa dalje, onda je teško biti prosperitetan u takvoj sredini. Ono što treba reći jeste da na sigurnost utiče mnogo faktora, odnosno da imamo različite uticaje na sigurnost. Nije to samo lična i imovinska sigurnost, nego imamo tu i druge sigurnosti koje su veoma bitne. Imamo pravnu sigurnost, socijalnu sigurnost, ekonomsku sigurnost, pa onda i ovu koja je najčešće u našoj ličnoj viziji, a to je lična i imovinska sigurnost. Također, kada neko nešto želi u to i ulaže. Ukoliko neka zajednica želi da ima prosperitetnu zajednicu, onda ulaže u ekonomiju, infrastrukturu, u sigurnost. Ono što je potrebno naglasiti jeste da, kada govorimo od VII PU-PS Ilijaš, općini Ilijaš i građanima Ilijaša, možemo reći da smo izuzetno zadovoljni saradnjom. To je jedan dvosmjerni odnos koji treba svakako da se unaprijedi. Možemo govoriti o sigurnosti i na osnovu informacija koje dobijamo iz medija i ponekad stvaramo neprirodnu sliku. Sami ste svjedoci da u našoj državi vlada uvjerenje da je to jedna izuzetno nesigurna zajednica, pa evo da uzmemo Kanton Sarajevo kao nešto što je personifikacija u tom smislu Bosne i Hercegovine. Jedna američka agencija je 2016. godine, koja se bavi istraživanjima sigurnosti, za potrebe EU uradila istraživanje sigurnosti, odnosno nesigurnosti glavnih gradova u Evropi. Imala je parametre: organizirani kriminal, narko kriminal, ubistva, korupcija, trgovina ljudima i tome slično. Prema tim parametrima odredili su 17 nesigurnih gradova u Evropi. Ono što je činjenica jeste da je Barselona proglašena najnesigurnijim gradom u Evropi kao prijestolnica krađa. Vama za informaciju, sva ta istraživanja objavio je njemački BILD, koji je respektabilan. Na drugom mjestu po nesigurnosti je Beograd, a na petom mjestu je Zagreb. Sarajevo, Ljubljana, Priština, Skoplje i Tirana nisu uopće na listi nesigurnih

gradova po tim parametrima. Dakle, te godine je u Sarajevu bilo pet ubistava, od toga tri ubistva u krugu porodice, rodbinskih veza. Kada je šef Evropske policije 2012. godine rekao da se u Sarajevu osjeća sigurnije nego u Hamburgu, većina medija ga je ismijala. Međutim, to je činjenica. Ono što treba reći jeste da se mi moramo malo više obratiti pažnju na činjenično stanje. Bilo koji događaj, paljevina, provala u kuću, teška saobraćajna nezgoda svakako osjeća sigurnosti kod ljudi pomjera u negativnom smislu. To je činjenica. Tada nastupaju mediji i pitaju kakvo je stanje, je li sigurno? Ko bi tada rekao da je sigurno i "bacao prašinu" ljudima u oči. Međutim, činjenica je da se mnoge stvari u društvenoj zajednici moraju dešavati i toga moramo biti svjesti. Ali, naš je zadatak, prije svega policije, a zatim i građana da toga bude što manje i da posljedice budu što lakše. S tim u vezi ja ću vas ukratko obavijestiti o stanju sigurnosti, a vi ste svakako dobili Informaciju u materijalima za sjednicu. U toku 2018. godine evidentirano je 114 krivičnih djela što je za 16 krivičnih djela više nego u 2017. godini. Najveći porast broja ovih krivičnih djela jesu krivična djela teških krađa, odnosno tzv. provale u kuće, a posebno u vikendice. Vi znate da u Ilijašu ima jako puno vikendica, a te vikendice su najčešće prazne i vjerujte ja sam u prvom mandatu kada sam radio u Ilijašu zamrzio vikendice i nikada je ne bih napravio, jer ljudi u nedjelju porade sve, odu u stan u Sarajevo ili već gdje, dođu u petak popodne ili u subotu ujutro i nađu sve razvaljeno i uništeno. Znali smo po 10-tak uviđaja raditi vikendom zbog provale u vikendice. Dakle, to je taj segment. Ono što treba reći jeste da nemamo teških krivičnih djela, teških tjelesnih povreda ili eventualno ubistava. Što se tiče nasilja u porodici, tu smo bili u istom nivou, odnosno smanjenje za dva slučaja i to je dobro. Tu društvena zajednica, posebno Službe socijalnog rada, zatim mediji, u cjelini utiču na to da imamo manji broj takvih krivičnih djela. Posjedovanje i uživanje opojnih droga, imamo smanjenje. Napad na ovlaštenu službenu osobu imamo dva slučaja. Rasvjetljenost krivičnih djela je 68,42%. To je ono što se tiče krivičnih djela općenito, nemamo ubistava, nemamo teških tjelesnih povreda. Naši policijski službenici su prema raspoloživim kapacitetima, ima nas 45 ukupno na naše područje i kada uzmemo i rashod i obaveze prema kantonalnoj policiji, odnosno prema javnim skupovima koji se održavaju na području Kantona Sarajevo gdje dajemo ispomoć, veoma je teško napraviti raspored koji bi zadovoljio naše potrebe. Međutim, mi smo dužni da prije svega vodimo računa o sigurnosti građana općine Ilijaš pa onda dalje i shodno tome se tako i ponašamo. Kada govorimo o javnom redu i miru to je nešto što je više vidljivo našim građanima, jer se često, odnosno najčešće se dešava na ulici i to je nešto što je manje opasno od krivičnih djela. Međutim, to utiče na raspoloženje građana i na percepciju sigurnosti u jednoj zajednici. U 2018. godini imali smo 64 prekršaja evidentirana. U 60 slučajeva je narušavanje javnog reda i mira i to je za 4 prekršaja više nego u 2017. godini. Velika većina ovih prekršaja se desila na ulici. To su od naročito drskog ponašanja 15, tuče 14, prosjačenje 13 itd. Kada govorimo o prosjačenju to je predviđeno kao prekršaj i ono što mi, kao policija, možemo učiniti jeste da učiniocu prekršaja prosjačenja uručimo prekršajni nalog ili ako je povratnik u činjenju ovih prekršaja evidentira svako činjenje i onda podnese zahtjev za pokretanje prekršajnog postupka. Često imamo ili smo imali zahtjeve, bilo pojedinaca ili institucija, da određene osobe uklonimo sa lica mjesta. Nažalost, policija nema takvih ovlaštenja. Naš policijski službenik ne smije za rukav dirnuti osobu koja se bavi prosjačenjem, može samo ako osoba nema lične dokumente za utvrđivanje identiteta zadržati osobu od 6 do 12 sati i onda na kraju pustiti. Ono što smo mi iz MUP Kantona Sarajevo pokušavali jeste da podignemo svijest građana i ispričat ću vam jednu sitnicu obzirom da sam dugo radio sa medijima i zamolio sam njih da nam pomognu, jer je to bila aktuelna tema. Predložio sam im da sa kamerom sa određene udaljenosti snimaju nekoga ko prosjači, ne direktno njega, nego onog ko daje. Pa kada taj čovjek da prosjaku novac, zaustavite ga i pitajte da li podržavate prosjačenje u Kantonu

Sarajevo. Odgovor novinara je bio da bi to bilo drsko i uticalo bi na svijest građana. Mi upravo i želimo da to utiče na svijest građana. U Sloveniji, političari, estradne ličnosti, javne ličnosti učestvuju u kampanjama da se podigne svijest građana. Dakle, imamo mogućnosti da pomognemo, znamo da naše stanovništvo želi pomoći drugima, ima tu empatiju, ali nikako da se okrene i daje priloge za narodnu kuhinju, crveni križ, merhamet, ustanove koje zbrinjavaju osobe sa poteškoćama u razvoju itd. Dakle, kada se tu daje, to se daleko bolje iskoristi, nego na ovaj način. Vjerujte, nismo imali niti jedan takav novinski prilog, nažalost. Ono što je veoma bitno za sigurnost, a imali smo i pitanje jednog vijećnika, jeste sigurnost saobraćaja. U 2018. godini evidentirane su 254 saobraćajne nezgode što je za 53 saobraćajne nezgode manje. Što je još bitnije, teške posljedice saobraćajnih nezgoda su smanjene. Imamo manje teže povrijeđenih osoba i to je veoma bitno. Znamo da je područje općine Ilijaš veliko i da imamo magistralne i autoput koji prolazi kroz općinu Ilijaš i da je to nešto što zaista zahtjeva posebnu budnost i posebnu organizaciju kontrole saobraćaja. Pored toga još da dodamo da imamo prilično dobro asfaltirane puteve u mjesnim zajednicama i oni su izazov, naročito mladim vozačima, da voze brže nego što bi trebali. U razgovoru sa predstavnicima mjesnih zajednica dolazimo do određenih podataka i takve njihove inicijative usmjeravaju naš rad, pa nam više nije strano postaviti radar da mjerimo brzinu i na lokalnim putevima. Međutim, opća kultura je nešto što je veoma bitno, a posebno u okviru opće kulture treba raditi na razvijanju saobraćajne kulture, a svakako preventivne i represivne mjere će uticati na to da se sigurnost saobraćaja, odnosno sigurnost učesnika u saobraćaju podigne na viši nivo. Kada govorimo o preventivnim aktivnostima, mogu reći da su naši policijski službenici izvršili kontrolu skoro 22.000 vozača, odnosno vozila. Organizirano je više pojačanih aktivnosti na sigurnosti saobraćaja, bilo da se radi o kantonalnom nivou ili općinskom nivou, a svakako mi radimo u saradnji sa našom jedinicom za sigurnost saobraćaja i kada oni nisu na terenu, onda smo mi i obrnuto. Takođe, naše aktivnosti su vezane za sigurnost saobraćaja i u saradnji sa inspekcijским organima koji su bitni za odvijanje saobraćaja. Treba napomenuti da smo imali značajan broj javnih skupova i manifestacija na području općine Ilijaš u 2018. godini. Tih skupova je bilo 128, angažovali smo preko 320 policijskih službenika na osiguranju tih skupova i treba napomenuti, a i vi ste svjedoci toga, da nismo imali narušavanje javnog reda i mira u većim obimima na takvim skupovima. Ono što treba napomenuti jeste da ono što je redovno i tradicionalno imamo "Ilijaške dane" kada imamo nekih rizičnih situacija, ali nismo imali narušavanje javnog reda i mira u većem obimu. Takođe, imali smo izbore i treba napomenuti prvi javni doček Nove Godine na otvorenom koje je zaista prošlo izvanredno. Organizatori su se potrudili da sve urade kako treba, mi smo bili tu, a i građani su bili na nivou i ponašali su se baš kako treba, svečarski, da im to ostane u lijepoj uspomeni. Kada govorimo o radu policije u zajednici, to je jedan novi projekat i svjesni ste toga, a evo i ovo jedan način rada policije sa zajednicom, da se pogledamo oči u oči, da pitamo ako nekome nešto nije jasno, da tražimo pomoć i da unaprijedimo našu saradnju. U našoj organizaciji imamo posebne policijske službenike koji se bave tim poslom i idemo preventivno, a naše ciljane grupe su od učenika osnovnih škola, srednjih škola, pa do građana u mjesnim zajednicama, udruženjima, društvima, nevladinim organizacijama i tome slično. Ono što treba reći jeste da imamo dobru saradnju, da to svakako podiže nivo zadovoljstva građana i nivo povjerenja u policiju, a svakako i povjerenje policije u građane, jer mi u našem poslu, bez građana, bez njihove pomoći teško možemo postići ovakve rezultate. Ono što treba reći jeste da je nas relativno malo, da mi ne možemo u svako doba biti na svakom mjestu, ali pomoć naših građana i u otkrivanju krivičnih djela, u rasvjetljavanju krivičnih djela, te pronalasku osoba za kojima mi tragamo i osoba za koje se zna da se bave određenim krivičnim djelima ili prekršajima u svakom slučaju nam pomažu naši građani. Ono što treba reći jeste da vi imate percepciju,

odnosno građani, a i mi, da znamo za određene osobe da se bave određenim nezakonitim radnjama. Međutim, ono što je bitno, a i vi ste naglasiti zakonitost, mi sve to moramo dokazati. Svaki dokaz koji je prikupljen na nezakonit način ne može se koristiti kao dokaz. Moramo to raditi sistemski i sistematično da bi smo došli do toga da jedna osoba koja na početku bude sumnjiva, kasnije bude i osuđena. Novi Pravilnik je u toku izrade i naše intencije su da se poveća broj izvršilaca na području općine Ilijaš. Zna se da se često govori o optimalnim brojevima na određeni broj stanovnika. To je jedna kategorija koje se ne može uzeti apsolutno, jer jedno je "veslati na mirnom jezeru, a drugo je "veslati na brzacima rijeke". Dakle, ne zavisi samo od broja građana, nego zavisi i od društvene situacije u toj zajednici, ukupne situacije i onda se može razgovarati o broju izvršilaca. I mi ćemo se potruditi, a imamo podršku načelnika i općinskih struktura da novi Pravilnik usvoji i popuni. Još jednom želim da zahvalim općinskom načelniku, općinskom vijeću i vijećnicima što ste našli i vremena i interesa da podržite aktivnost oko ugradnje video nadzora na području općine Ilijaš. Svečano otvaranje će biti 28.02.2019. godine u 11:30 h i pozivam vas da dođete i prisustvujete tom činu, jer je to nešto veoma bitno. Već ja i moje kolege imamo pitanja građana šta kamere snimaju, kako? Sve snimaju i sigurno će to imati uticaja na sigurnost u našoj općini.

SEMIR DEDIĆ – vijećnik SDA

Želim pohvaliti komandira Nefića i rad svih uposlenih u PS Ilijaš. Već ste rekli, a i moje je mišljenje da nam nedostaje broj ljudi u PS Ilijaš. Ne znam koja je procedura, ali možda u budućnosti razmisliti kakva je mogućnost da se postavi stacionirani radar u ul. Bosanski put, pravac kod autobuske stanice.

IRFAN NEFIĆ – komandir PS Ilijaš

Hvala na čestitkama, a to treba zahvaliti policijskim službenicima na terenu, a i nama koji organiziramo, ali oni su ti koji su doprinjeli. Što se tiče stacionarnih radara, već sam razgovarao sa predstavnicima MZ Lješevu, jer se ukazao problem, a ukazao se problem i u Malešićima i što ne mogemo stići stacionarnim, radit ćemo pokretnim radarom. Bilo bi dobro da OV-e usvoji taj zaključak i to bi nama dalo "vjetar u leđa" da možemo tražiti dalje.

RASIM ŠEHIĆ – vijećnik SDA

Obzirom da smo konstatovali koliko znači prisustvo policijskih službenika na terenu, a i novih tehnologija – kamera, mene interesuje i vjerovatno raspoložete informacijama po pitanju Policijske stanice u Srednjem. Znamo koliko je to gore razuđen prostor, a imamo i evo relativno pozitivan izvještaj, a imamo i krađu vikend objekata i značilo bi puno prisustvo policijskih službenika na terenu. S tim u vezi, moje pitanje je dokle se stiglo sa realizacijom ovog projekta i kada će biti ista stanica puštena u funkciju?

IRFAN NEFIĆ – komandir PS Ilijaš

Postojećim Pravilnikom predviđeno je da PS Ilijaš u svom sastavu ima i Policijsko odjeljenje u Srednjem. Prije nekoliko godina smo imali to odjeljenje, međutim ono je radilo u neuslovnim prostorijama i sada se radi nova zgrada i čim se završi bit će puštena u rad. Međutim, po novom Pravilniku se treba izvršiti popuna i vama za informaciju, postojećim Pravilnikom predviđeno je 17 policijskih službenika uz komandira da budu u Srednjem

stalno. Mi smo tražili da se poveća broj općenito, jer tih 17 pokriva jednu smjen, ali ako neko ode na godišnji odmor, na bolovanje ili ode na ispomoć, onda to već nije uredu. Mi ćemo svakako insistirati koliko možemo, da u novom Pravilniku imamo povećan broj izvršilaca, jer sigurno je da je to veoma veliki prostor i time ćemo ohrabriti građane da svrate gore, da se privreda razvija, jer ima naznaka da bi se mogli otvoriti neki privredni objekti. Takođe, razmišljali smo i to ćemo vidjeti u MUP-u da određene dijelove administracije premjestimo gore da građani mogu u Srednjem podnijeti zahtjev za izradu lične karte. U tom smislu, te aktivnosti su u toku i potrudit ćemo se da to bude što prije, ali sada je to stvar tehničke prirode.

ALAN ŠERAK – vijećnik SDP-a

Ono što mogu reći kao građanin, kao predsjednik političkog subjekta i kao vijećnik, ja sam zadovoljan sa veoma niskim procentom kriminaliteta kod nas u Ilijašu, jer Ilijaš i važi za jedan miran gradić, između ostalog i za jedan čist gradić, da malo i sebe pohvalim. Rad policije u Ilijašu je za svaku pohvalu. Znamo da imate određenih kadrovskih problema u smislu nedovoljnog broja izvršilaca kada se tiče naše policijske uprave. Međutim, blagu primjedu imam, kada je u pitanju rad naše policije u Ilijašu, a to je postojanje određenog broja vandalizma. Na to bi trebalo malo više pažnje obratiti u budućnosti. Konkretno, radi se o dječijem igralištu koje se nalazi u neposrednoj blizini bivše slastičarne "Bosna". Takođe imamo i primjer vandalizma u Alića Gaju gdje smo uložili određena sredstva, revitalizirali to spomen obilježje, ali deset dana nakon toga vidjeli smo da je ono poprimilo onaj svoj stari izgled razrušenosti i prljavosti koje je prije imalo. Tako da na vas apeliram da u budućnosti malo više pažnje obratite na ove stvari, pogotovo u noćnim satima, jer smo svjedoci da se u noćnim satima određene sumnjive grupe okupljaju upravo na Spomen obilježju Alića Gaj. Druga stvar, tiče se prosjačenja u Ilijašu koje je postalo stvarno veliki problem i mi smo svi svjedoci toga, pogotovo u ljetnom periodu kada nam dolazi dijaspora. Bukavno se od prosjaka koji stanuju u Ilijašu ne može živjeti. Svoje aktivnosti moramo nekako usmjeriti u tom pravcu da što je moguće više suzbijemo takvu vrstu pojave, a razumijem da je to teško dokazivo djelo obzirom da se radi o maloljetnim osobama. Međutim, neke stvari mi moramo uraditi u tom pravcu.

IRFAN NEFIĆ – komandir PS Ilijaš

U svakom poslu ima nedovoljnog angažmana ili neprepoznavanja problema na vrijeme, ali u svakom slučaju ja sam evidentirao ovo oko vandalizma na tim objektima, a što se tiče prosjačenja već ste me čuli i mi bi smo bili najsretniji kada bi se Zakon o prekršajima promijenio član 8. Da mi imamo mogućnost da tu osobu koju zateknemo u prosjačenju da je stavimo u naše vozilo i odvezemo u neki centar, ali ono što imamo mogućnosti sa maloljetnom djecom jeste da kada maloljetno dijete nađemo u prosjačenju, uz našu pomoć predstavnik Službe socijalne zaštite to dijete odvede u dnevni centar. Tamo se dijete okupa, odjene, nahrani, da mu se nešto da da crta i piše, mi pozovemo roditelje i onda oni kažu da je dijete izašlo do prodavnice da nešto kupi i ne znaju odkud tamo. Ali svejedno, to je od 300 do 900 KM za roditelje kazna kada se utvrdi da je prekršaj počinjen zbog propuštanja dužnog staranja od strane roditelja ili staratelja, a ta kazna nikada ne bude plaćena i na tome se stane. Za odrasle punoljetne osobe osim onog privođenja odnosno dovođenja u stanicu radi identifikacije, nemamo drugog načina. Zato bi trebalo raditi na svijesti. Prosjačenja je više tamo gdje se dijeli, gdje se dobiva. Na tome bi trebalo raditi da se podigne svijest građana da svoje dobrovoljne priloge daju za nekog bolesnog ili merhamet, Pazarić, bilo gdje. To će se daleko korisnije upotrijebiti nego ovo. Iskreno, mi se

snalazimo na svaki mogući način, ali evo ja sam imao problem sa OSCE-om jer oni imaju poseban senzibilitet prema takvim osobama i onda je tu problem. Svakako ćemo uzeti u obzir sve i snalaziti ćemo se kako možemo, ali da znate da je to takvo stanje. Bilo bi dobro kada bi se Zakon malo promijenio i nama bi bilo lakše, a i stanje bi bilo bolje. Nisu svi ni natjerani da stvarno prose, nego je to nešto što je organizirano i što kaže gospodin Šerak to je teško dokazati, jer su sve to osobe koje mnoge od njih nemaju ni ličnu kartu i kada je u pitanju svjedočenje, jedno kažu u stanici, a sasvim drugo na sudu i onda nemaš šta tu uraditi.

MUHAMED HANDŽIĆ – vijećnik BPS-Sefer Halilović

Želim potvrditi činjenice sa terena, a radi se o proteklom problemu koji je imao Kanton Sarajevo i Federacija BiH, a to je ubistvo, odnosno dvostruko ubistvo na ovom području i moram reći da je Policijska stanica Ilijaš krajnje profesionalno postupila i operativno pokrila sva ova područja koja gravitiraju bar bliže Hadžićima, a posebno se ovo odnosi na Bioču gdje je primjećeno više civilnih vozila koja se nisu kretala biočkim putevima, pa su građani tražili od mene odgovor ko su ti, pa sam ja rekao da je to policija i da patroliraju iz ovog razloga, tako da su građani bili donekle sigurniji i mirniji i nastojali smo pomoći policijskim službenicima onoliko koliko smo mogli. Dalje, migrantska kriza će sigurno biti veliki problem, naročito sada u proljeće. Ovo je moje zapažanje kao profesionalca iz struke bezbjednosti. Dakle, vi ćete morati vjerovatno na tome poraditi, a predlažem da formirate i timove, a vi imate koordinate sa svim mjesnim zajednicama i da održe po jedan sastanak možda bi bilo dobro sa građanima na područjima mjesnih zajednica. Pojavljivat će se migranti vjerujte u svim dijelovima naše općine i pitanje je samo hoćemo li imati tu invaziju ovdje. Dalje, vidio sam da oni problemi koji su bili najsimpomatičniji na općini Ilijaš, a to su prevare i šumske krađe sada je nula ovdje i raduje me da nema prevara u Ilijašu. Što je bitno, a da ne ulazimo u kadrovsku politiku policije i službe sigurnosti na Kantonu Sarajevo, ali je činjenica da naši policajci, mislim na općinu Ilijaš, mislim na komandira Halilovića koji je bio prije vas i vi ste takođe naš, najbolje poznajete ovaj prostor i da je znatno smanjen broj svih ovih neželjenih djela od kako ste vi ovdje i gospodin Halilović. Moramo ga pohvaliti, jer je zaista profesionalac i došao je ovdje u najteže vrijeme kada je bila eskalacija krađe kablova i onoga svega što se nama ovdje dešavalo u Ilijašu. Dakle, puna podrška i čestitam na profesionalnosti i ono što ste uradili vi i vaš prethodnik u prethodnom mandatu.

IRFAN NEFIĆ – komandir PS Ilijaš

Jedna dobronamjerna upadica, meni nije ovdje sa vama gubljenje vremena, došao sam da ga korisno iskoristim i hvala vam što vodite brigu o tome. Ono što mogu reći jeste da smo se više dali na teren i vi da znate, a možete prenijeti i građanima da ako vidite naša patrolna vozila posebno u večernjim satima sa rotacijama, nije to ništa posebno, to je redovno kako bi smo prevenirali određene događaje. Ako je u pitanju neki zadatak tada to radimo malo diskretnije sa drugim vozilima i ostalo. Svakako ćemo uzeti u obzir ovo oko migrantske krize i to je državni problem. U Vogošći imamo nekih pojava, ali u Ilijašu sada nema, što ne znači da neće biti.

Hvala vam na čestitkama, a Amira Halilovića ćemo svakako pozvati na otvaranje video nadzora koji je ovu aktivnost počeo sa menadžmentom općine Ilijaš.

## SEAD ŠEHIĆ – vijećnik SDA

Generalno, sve pohvale za izvještaj, ali bih iskoristio priliku prisustvo komandira Nefića, a tiče se parkiranja u ulici od džamije prema Banovcu, a tu je skretanje gdje je bila Raiffeisen banka. Vrlo često na samom početku se parkiraju auta i to se već godinama dešava, a mislim da se više ne može uticati na savjest nesavjesnih vozača, nego bi trebalo malo represivnije djelovati. U blizini je vrtić, osnovna škola, srednja škola i mislim da bi stvarno trebalo nešto uraditi po ovom pitanju.

## IRFAN NEFIĆ – komandir PS Ilijaš

U pravu ste i problem parkiranja u Kantonu Sarajevo je posebno izražen, a u općini Ilijaš postoji značajan broj parking mjesta.

Najviše prekršajnih naloga imamo za nepropisno parkiranje. Ne možemo sve stići i svjesni ste toga, ali možemo većinu i tako i radimo.

## AKIF BEŠLIJA – vijećnik SBB-a

Uz sve čestitke i pohvale u radu, a ono što mene interesuje, u procentima jeste smanjeno, ali je još zabrinjavajuće, a to je broj vozača bez položenog vozačkog ispita. Ne mogu da vjerujemo da je to tako, a i vozači pod dejstvom alkohola. Kada bi se malo više poradimo na ovim stavkama, smanjio bi se ukupan broj saobraćajnih nezgoda. Znači na kontrolu brzine, kontrolu pod dejstvom alkohola, neregistrovanih vozila i bez vozačkih dozvola staviti još veći akcenat i to će dati još bolje rezultate.

## IRFAN NEFIĆ – komandir PS Ilijaš

Samo povećanje broja na papiru znači da smo mi pojačali naše aktivnosti. Kada imamo više prosjaka koji su kažnjeni to znači da smo mi pojačali naše aktivnosti. To ne znači da se ukupni broj povećao. Mi smo svjesni toga da je najčešći uzrok nepridržavanje propisane brzine i voženje pod dejstvom alkohola. Mi smo toga svjesni i mi to radimo.

## SEMIR DIZDAREVIĆ – samostalni vijećnik

Da li će se uz pomoć ovih kamera što se postavljaju moći riješiti pitanje stranih tablica. U ljetnom periodu dolaze ljudi iz dijaspor i sve što ne mogu "divljati" tamo, "divljaju" ovdje dva mjeseca i onda odu. Znači, hoće li se moći šta uraditi po ovom pitanju tj. ako oni poštuju pravila u Njemačkoj, da i ovdje poštuju pravila.

## IRFAN NEFIĆ – komandir PS Ilijaš

U pravu ste. Mi smo do sada koristili te kamere, ali dok se zvanično ne puste u rad ne mogu se koristiti kao dokaz. Koristili smo kamere kao indiciju za pojedine ljude. Imali smo situaciju da je jedan BMW ušao u pješačku zonu i našli smo čovjeka o kome se radi. Imamo na ulazu i izlazu posebne kamere koje snimaju tablice i kada ukucamo brojeve te tablice, za određeni vremenski period unazad, kada god se to vozilo pojavilo u gradu, imat ćemo podatke. Uglavnom moći će se koristiti kamere i radimo na tome. Postavljeni su znakovi da je grad pod video nadzorom i to je prvi preduslov da bi se kao dokaz mogle koristiti te kamere, a drugo jeste da će to sve kontrolirati MUP i IDEA.



MEHMED SMAJLOVIĆ – predsjednik savjeta MZ Mrakovo

Ovdje se ne spominje Tužilaštvo Kantona Sarajevo koje je jako bitan segment, veza policije i tužilaštva i mislim da ta veza ne funkcioniše. U tom kontekstu, da li politika, da li ministarstvo ili vi, trebate tu vezu uspostaviti.

IRFAN NEFIĆ – komandir PS Ilijaš

Kada mi završimo posao i kada predamo u tužilaštvo, mi više nismo nadležni.

Diskutanata po ovoj tački dnevnog reda više nije bilo, pa je OV-e primilo k znanju

Informacija o stanju kriminaliteta, javnog reda i mira i saobraćaja na području općine Ilijaš  
za 2018. godinu

AD-4

Izveštaj o radu općinskog načelnika i službi općine Ilijaš za 2018. godinu

AKIF FAZLIĆ – općinski načelnik

Dobili ste materijal u kojem praktično sve piše. Ono što mene raduje jeste da je Izveštaj metodološki jako dobro napravljen, da se iz njega vide sve aktivnosti, a njih je bilo jako puno. I ono što mi je takođe drago, a mi često malo zaboravimo osnovnu ulogu organa uprave, a to je rješavanje imovinsko-pravnih odnosa, odnosa sa strankama. Također, važan segment ovog Izveštaja jeste pitanje prostorno planske dokumentacije, dakle donošenje regulacionih planova, donošenje druge vrste planova. Zna da je cijeli Kanton Sarajevo, pa prema tome i općina Ilijaš u fazi izrade novih urbanističkih planova gdje Skupština KS prije godinu dana donijela odluku da se urade, obzirom da su istekli urbanistički planovi, i urbanistički plan za urbano područje općine Ilijaš. Nosilac izrade je Zavod za planiranje razvoja Kantona Sarajevo, a izrada tih urbanističkih planova kasni i znam da je i nova Vlada pokrenula tu inicijativu, jer je bitno da što prije dođemo do nove planske dokumentacije i jedna vrlo važna aktivnost, to je jedan temeljni plan nižeg reda u odnosu na prostorni plan, a u vezi regulacionih planova to ćemo mi, kao organ uprave, zajedno sa vama dosta provoditi vremena vjerovatno i kada je u pitanju izrada ovog plana. Također, bitne i važne aktivnosti koje vodi imovinsko-pravna služba i katastar, o tome ste redovno informisani i što mi je drago jeste da se stalno uključujemo u nove projekte iz ove oblasti i u nekom srednjoročnom periodu bićemo općina koja će to imati potpuno uređeno. Značajan segment aktivnosti jesu aktivnosti sa nevladinim sektorom, udruženjima, svim onim što mi finansiramo kroz tekuće grantove i tu ste vidjeli veliki broj aktivnosti, veliki broj podrški koje ova općina kroz Budžet podržava. Imamo puno aktivnosti koje su vezane za međunarodne organizacije, od UNDP-a, JEP-a i još niz nekih drugih u koje smo aktivno uključeni i kroz tu aktivnost želimo da popravljamo i gradimo imidž ove općine. Naravno, onaj najznačajniji dio koji svi najviše gledamo za koje su najviše zainteresirani građani, jeste realizacija projekata, realizacija investicija, kapitalnih grantova. Dakle, u ovom Izveštaju su praktično pobrojane sve aktivnosti, Izveštaj je na 45 stranica i zaista imate informaciju o svakom takvom projektu. Ono što želim reći jeste da je zaista prošle godine realizirano nekoliko vrlo značajnih projekata po kojima se 2018. godina može cijeliti jako uspješnom. Ono što jeste možda slabost aktivnosti u prošloj godini jeste da imamo tri vrste nekih aktivnosti iz oblasti kapitalnih investicija u smislu da se kasnilo sa realizacijom i implementacijom sredstava koje smo uspjeli kroz sporazume zaključiti sa

Vladom Kantona Sarajevo, a to su projekti vezani za izgradnju saobraćajne infrastrukture i sredstava OKFŠ-a, zatim projekti dalje izgradnje industrijskih zona također su vezani za sporazum sa Ministarstvom privrede Kantona Sarajevo, a i u tim projektima najviše su saobraćajnice i komunalna infrastruktura i jesu projekti koji su vezani direktno za Direkciju za ceste Kantona Sarajevo koja je prošle godine realizirala samo jedan projekat i to nastavak rekonstrukcije regionalne ceste u Mjesnoj zajednici Lješevo, a u njihovom programu bio je pozicioniran kao jedan od nultih prioriteta projekat rekonstrukcije ceste Stari Ilijaš-Malešići. Ali zbog situacije kakva jeste bila u Direkciji za ceste Kantona Sarajevo do toga nije došlo, ali vidjet ćete i vidjeli ste u Operativnom planu da su u ovoj godini četiri vrlo značajna projekta pozicionirana i ono što će biti moja želja i želja svih nas da se probaju svi ti projekti realizirati. Od ovih velikih projekata imali smo, a evo sutra otvaramo filter postrojenje u Sokolini kojim se rješava pitanje mutnoće vode, izgrađena je nova fiskulturna sala u OŠ "Hašim Spahić", završili smo centralni trg Alije Izetbegović, u punom su jeku završeci radova Društvenog doma u Podlugovima, započeta realizacija gradskog stadiona, niz saobraćajnih puteva po mjesnim zajednicama realizirano, od onih značajnih kao što je put Vlačkovo-Gornja Karaula, put za naselje Buljetovina u dužini od 2,5 km, Borak 1,5 km, povezivanje Kadarića i Balbegovića, uz niz manjih rekonstrukcija gotovo u svim mjesnim zajednicama, obilježili su aktivnosti kada je u pitanju saobraćajna infrastruktura. Danas o detaljima neću govoriti, pročitali ste sigurno Izvještaj i cijenim da možemo više o ovom Izvještaju kroz raspravu i pitanja dati njegovu ocjenu i na osnovu toga i usvojiti ovaj Izvještaj.

MUHAMED HANDŽIĆ – vijećnik BPS-Sefer Halilović

Hvala načelniku na iscrpnom obrazloženju Izvještaja, međutim, danas ovdje nedostaju personalci, kreatori ovog rada po ovom Izvještaju. Prije svega, mislim na inspektore. Oni kao da osjećaju neodgovornost ili nemaju obavezu biti danas ovdje sa nama. Ovaj Izvještaj jednom godišnje usvajamo i mi smo jedan ozbiljan organ i oni su danas trebali biti prisutni na sjednici da nam odgovore na neka pitanja. Sve ono što budem danas postavio ne želim da me pita niti jedan od njih na ulici. Ja na ulici ne pričam ni o politici ni o problemima koji se tiču svih nas. Prvo pitanje, a načelnik je pomenio Trg Alije Izetbegovića, a kroz Izvještaj vidim da nije realizovan ni program numerisanja stambenih jedinica za proteklu godinu, a planirali smo. Čini mi se da mi tu pravimo malo više problema nego što bi trebalo. Možda nisam upravu, ali mislim da bi sve ove procedure trebalo da budu provede ovdje kod nas kao inicijativa i da mijenjanje ulica i nazivi trgova idu u Skupštinu Kantona i da se to usvaja gore, a možda nisam upravu za ovo i vjerovatno će mi neko od pravnika objasniti. To je kad se tiče trga, a kada se tiče numerisanja stambenih jedinica, mislim da je krajnje vrijeme da uđemo ozbiljno u taj projekat da to završimo i možda smo jedini na Kantonu Sarajevo koji nismo numerisali stambene jedinice i kada uđeš u općinu Ilijaš vidiš samo jednu ulicu ovu Bosansku, a sve ostale ovi koji nam dolaze ne znaju gdje su. Sada i mi imamo apetita pa bi mijenjali nazive ulica, provodimo javne rasprave, dajemo neke nelogične prijedloge. Dakle, moramo biti svjesni činjenice da i ove postojeće ulice koje se zovu tako kako se zovu poslije rata, ništa ne smeta da ostanu nazivi kakvi jesu. Šta imamo izmišljati toplu vodu kada je to sve tu. Kada se tiče inspektora, ovdje kada smo uvijek postavljali pitanja, odgovarali su "nije to moja nadležnost". Ja sam dobio na papiru šta su njihove nadležnosti i neću postaviti niti jedno pitanje koje nije u nadležnosti jednog od naših inspektora, a to je snabdijevanje pitkom vodom iz vodovoda od lokalnog značaja. Ovdje sam postavljao pitanje ko je odgovoran za kolektivne vodovode kojim se snabdijeva Bioča npr. stotinu domaćinstava se snabdijeva pitkom vodom, a tu vodu nitko ne tretira ni u dvije godine jednom. Ko će snositi

odgovornost ako dođe do eventualnog trovanja. Znamo da jedan od ovih vodovoda koristi i područna škola u Bioči. Sve su to indikatori koji mogu dovesti do problema. Evo vidim da je to nadležnost našeg inspektora, pa neka se pozabavi tim problemom i nadam se da će on to riješiti prije nego naša direktorica JKP "Vodostan" Ilijaš koju sam molio da nam riješi taj problem hlorisanja da ne bi došlo do trovanja, ali ona nema takva ovlaštenja i nije nam nikad ni riješeno. Drugo, odvođenje i prečišćavanje otpadnih voda i kanalizacije od lokalnog značaja, odvoz i zbrinjavanje fekalne i specifične kanalizacije i septičkih jama. Kada prođete kroz Luku i otiđite do Bioče, imate milion tona đubreta od pilića i kokoški od pilićara koje ide u potok. Te pilićare nemaju ni ekološku ni upotrebnu niti bilo koju drugu dozvolu. Ja to tvrdim, a ako imaju ekološku dozvolu, to je ekološka bomba, onda je to trovanje građana Ilijaša. Isto to, da ne bih bio onaj koji se ponavlja iz godine u godinu, je veći problem sa farmom "Mujanović". Kada pusti stajsko đubrivo u rijeku Bosnu, mi ovdje ne možemo živjeti. Trebamo bježati 2-3 dana iz Ilijaša ili se zatvoriti u stanove i zatvoriti sve. Ni klima ne pomaže. Dakle, dajte da preduzmu neke mjere da se ovo više rješava. Ovo što rade poljoprivrednici, znamo da ljudi trebaju živjeti i neka žive, ali kada poštuju i traže sve benefite, neka poštuju i standarde, a to je da obezbjede određena sredstva kako neće trovati građane. Za pilićare ćemo napraviti prijavu, a nemojte se iznenaditi ako budu pozvali i nas vijećenike, i izvršnu i zakonodavnu vlast općine Ilijaš da dođemo na sastanak i da im kažemo zbog čega smo ovo dozvolili. Ako treba ja ću donijeti i slike, jer obično ako ne donesem slike ovdje kao da nisam ništa ni rekao.

Zauzimanje javnih površina. Maloprije je, čini mi se Sead Šehić, istakao problem oko parkiranja na Banovcu kod zgrade gdje je bila Raiffaisen banka. Ja sam prije 3-4 godine rekao ovdje da je problem bašta kako je zovu, ona što je od betona i armature rađena i što je u nju dovedena sva infrastruktura (voda, struja), a građani ne mogu dobiti ni struju, ni vodu ako nemaju građevinsku dozvolu. Ovaj tip nema građevinsku dozvolu, napravio je baštu od betona i onemogućava građanima da se parkiraju tamo i da se okrenu na Banovcu. E to je problem gospodine Sejo Šehiću i to inspektor ne radi, zauzimanje javnih površina. Ovo je trajno zauzimanje javnih površina, nije privremeno i ne možete ovo nazvati baštom nikako. Sljedeće, Odluka o kućnom redu u stambenim zgradama. Ako ne platimo održavanje zgrade uredno nam dođe tužba. Od nas, upravitelj uzima svaki mjesec 20% od uplaćenog bez ikakvih radova. Znači, samo što je upravitelj, uzima 20% i to morate svi znati. Kad je zima, on je odgovoran da očisti ispred zgrade i snijeg i led, ali to niko ne čisti. Svjedoci smo toga. I ovo je posao komunalnog inspektora i neka radi ovo, a ne da ovdje priča "vi ne znate šta je moja nadležnost i nije moja nadležnost".

To je sve što se tiče ovog Izvještaja, a za ostalo nemamo nikakvih primjedbi, ali na ovome se mora zaista poraditi.

**RASIM ŠEHIĆ – vijećnik SDA**

Uvažavajući diskusiju kolege Handžića ja želim samo da pohvalim ovaj Izvještaj i ne sam izvještaj, prilikom usvajanja Budžeta konstatovali smo tada da će Budžet kao Budžet za 2018. godinu biti teško realizovati, jer svi mi prilikom kreiranja Operativnog plana i Budžeta delegiramo određene projekte koje nama načelnik, uglavnom nastoji izaći u susret, a na kraju budemo suočeni sa situacijom nemogućnosti realizacije određenih projekata tako da sam ovaj Izvještaj koncipirao je projekte koji su u dobroj mjeri riješeni i koji odražavaju naprioritetnije potrebe građana Ilijaša. S tim u vezi, još jednom pohvaljujem ovaj Izvještaj.

**ALMIR ŠPIODIĆ – vijećnik BPS-Sefer Halilović**

Koristim priliku da pohvalim ovaj Izvještaj koji je izuzetno obiman i obrazložen.

Sa diskusijom kolege Handžića se upotpunosti slažem s tim da ću se nadovezati ovdje na stavku koju tretira komunalni inspektor, a to je prokopavanje javnih površina. Lično sam više puta postavljao pitanje, pokretao inicijative, sugerisao i ukazivao na probleme oko prokopavanja javnih površina kompanije Telecom koja je radila na prostoru MZ Mrakovo, Podlugovi, Lješevo i Ljubnići i ovdje piše da oni nisu imali niti jednu intervenciju. Još 2017. godine sam upozoravao na prokopavanje tek izgrađenog novog asfalta koje je radila Elektro distribucija u naselju Doci, Obala i Sovrle. Prekopali su asfalt, položili kablove i dan danas nisu vratili u prvobitno stanje. I danas je bila takva inicijativa u užem jezgru grada Ilijaša. Kao što reče kolega Handžić, kada to pitanje postaviš, dobiješ odgovor "vidjet ćemo, čučemo se, riješićemo, polako šta ste navalili, dok se završe radovi...". Znači, dobro nam je dat ovdje odgovor da je nadležan komunalni inspektor. Ovdje piše prokopavanje javnih površina i stavljene su crtice, nisu ni nule. Znači nema ni nula predmeta koji su oni obradili na taj način. Osvrnuo bih se na Službu za saobraćaj i komunalne poslove. Za svaku pohvalu posao. Bilo je dosta projekata koji su se uspjeli realizovati i to je zasigurno zahtijevalo dosta prateće dokumentacije, dosta nadzora. Ono što me ovdje interesuje jeste ovaj nadzor. Nadzor je firma IG iz Banja Luke. Sada se postavlja pitanje, na utrošenih 5 miliona KM na infrastrukturu na području općine Ilijaš, a to je putna infrastruktura, izgradnja objekata i sl., koliko je firma IG Banja Luka uspjela izvršiti kvalitetan nadzor? Jesu li objekti urađeni kvalitetno, jesu li putevi urađeni kvalitetno onako kako su predviđeni projektom? Volio bih da imam informaciju od njih koliko su puta uopšte vršili nadzor? Znamo da na nekim radovima je potrebno vršiti nadzor skoro svakodnevno. Za svaku pohvalu je angažman Službe, jer je bilo potrebno dosta predračuna, predmjera i pratiti sve te aktivnosti. Zasigurno je neizbježno pohvaliti Službu za društvene djelatnosti koja isto ima dosta posla u smislu organizacije, jer ima dosta djelatnosti koje kontroliše ova Služba i vidimo kroz ovaj Izvještaj da su imali puno posla, a dosta je sredstava preko te Službe isplaćeno određenim organizacijama, klubovima, nevladinim organizacijama. Ono što mene interesuje je koliko su ta sredstva, a nadam se da jesu, u cjelosti opravdana za namjenu za koju su davana. Znači, ova Služba ima dosta posla i sve pohvale za ovo što je stigla da uradi i ovo je sugestija i nadam se da su sredstva koja su isplaćivana i opravdana u namjenu za koju su i data. U suštini ovo je dobro, s tim da se može unaprijediti i poboljšati i ka tome treba i težiti.

MEHO DŽINDO – vijećnik LDS-a

Iz ovog Izvještaja, kada je u pitanju stambena oblast, ne vidim nigdje šta je sa stanovima koji su u vlasništvu općine, a dodijeljeni su na privremeno korištenje. Da li ima nekih zakonskih akata? Da li se oni mogu prodavati? Da li se mogu dalje dodjeljivati? Kakav je njihov status? Već dvadeset i nešto godina od rata, a to se produžava sve vrijeme, pa me to interesuje. Odgovor ne mora biti odmah, može i na sljedećoj sjednici OV-a. Osim toga, u ranijem sazivu Vijeća, donijeli smo Zaključak da stanari kojima je dodijeljen stan na privremeno korištenje, između ostalog, da bi produžili Ugovor, moraju plaćati i održavanje. Ima dosta slučajeva gdje se to ne radi i predlažem da opet donesemo jedan Zaključak da općina ne izdaje dalje Rješenje, ako nisu ispunjene sve obaveze, odnosno ako se i ta zakonska obaveza ne ispunjava. Ako to stanari ne mogu, onda predlažem da plati općina ili neka Socijalna služba ili na drugi način.

AKIF FAZLIĆ – općinski načelnik

Hvala na pohvalama za ovaj Izvještaj. Ja sigurno iza ove govornice mogu kazati da je organ uprave u Ilijašu sigurno jedan najbolji organ od svih općina u Kantonu Sarajevo.

Koliko god ima slabosti, a evo i danas smo ih identificirali, a i ja znam kao i vi gdje su te slabosti i šta treba popraviti, ali kada te slabosti i obim tih slabosti stavimo na stranu i kada se vratimo čitavom obimu ovoga svega što radi ovaj organ uprave, kad se vratimo na broj ljudi koji je uposlen u ovom organu, sigurno je ubjedljivo najefikasniji organ uprave od svih općina u Kantonu Sarajevo. Ja kažem i najbolji, a ako bi se mjerio rezultatima i ako bi se mjerio projektima, a većina općina ima veće Budžete od nas, onda bi vidjeli da ti organi u drugim općinama puno više para troše na sebe, na administraciju, na neke troškove. Iz izvršenja Budžeta vidjeli ste da mi i ovo Vijeće troši svega 20% ovog Budžeta i to je osnovni parametar za koji ste i vi iskazali čestitke i ja vam na tome zahvaljujem. Ovdje je bilo nekoliko stvari sa kojima se ja potpuno slažem. Ja moram kazati da kao načelnik nisam htio urediti pitanje inspektorata na pravi način. Kažem nisam. Mi znamo kako funkcionišu naši inspektori i koje su slabosti u tome i zaista sigurno jeste vrijeme i moramo to što prije riješiti na pravi način. To će sigurno biti jedna od narednih aktivnosti. Ovo što je Muhamed Handžić pitao vezano za nazive ulica, treba proći proceduru. Zna da smo, mislim, prije godinu dana donijeli novu Odluku za izradu adresnog registra, da smo utvrdili nazive ulica, da smo se upravo rukovodili ovim kriterijima kako je vijećnik Muhamed Handžić i kazao da se puno oko imena ne bavimo, nego smo išli na geografske podjele. Kada je u pitanju ovih nekoliko pitanja koja su postavljena, pitanje odgovornosti i ispravnosti vode Bioča, to je bilo vaše pitanje na koje smo dali odgovor. U suštini, odgovoran je vlasnik vodovodnog sistema. Vlasnik vodovodnog sistema dužan je da nađe meritornu ustanovu koja će upravljati tim vodovodom s aspekta Zakona o vodama. Vodovod koji je izgrađen u Bioči, vlasnici nisu našli nikoga. Nisu vodovod predali nikome i takođe i vodovod je jedna stvar koju trebamo urediti. Logično je da se on preda na upravljanje JKP "Vodostan", ali prije nego što se preda Vodostanu na upravljanje, treba završiti neke aktivnosti oko zatvaranja sistema u smislu hlorinacije, vodomjera. Dakle, napraviti jedan elaborat i taj elaborat, kao što ćemo evo predati i video nadzor sa elaboratom Policijskoj upravi, predati JKP "Vodostan" i to treba uraditi u ovoj godini. Pitanje tretmana otpadnih voda, nažalost, je jedno od najtežih pitanja kada je općina Ilijaš u pitanju. Mi puno radimo kanalizacionih mreža, puno se ulaže u to, recipienti su sada vodotoci, nemamo niti jednog prečistača. Mi smo od Agencije za vodu dobili za narednih pet godina privremeno odobrenje da možemo koristiti vodotoke, odnosno rijeku Bosnu kao recipient i da u tom periodu dakle moramo nešto rješavati po pitanju tretmana otpadnih voda. Dakle, pred nama je jedna vrlo ozbiljna zadaća u narednom čitavom mandatu. Ovo što si Muhamede govorio za rad ovih farmi, većina farmi ima odobrenje, a ima ih i većina koja nema odobrenje, ali očito se svi ponašaju kao da nemaju. Po našem običaju svi se tako ponašaju i ovdje treba puno veći angažman, ne samo našeg inspektora, nego i kantonalnih iz nekoliko oblasti. Pitanje kontrolisanja upravitelja javnih površina, to je naravno ono što jeste ova oblast. Kada su u pitanju nadzori, ovo što je vijećnik Špiodić postavio, kroz ovaj Izvještaj vidjeli ste da smo imali tri nadzora. Jedan je IG Banja Luka, drugi je PRONASA i treći Zavod za izgradnju Kantona Sarajevo. Mi smo, gdje god smo mogli, preferirali Zavod za izgradnju Kantona Sarajevo, a njega možemo gdje god se nađu sredstva Vlade Kantona Sarajevo. Ovi veliki projekti su praktično kontrolisani od strane Zavoda za izgradnju Kantona Sarajevo. Pitanje nadzora je regulisano da se on mora birati po Zakonu o javnim nabavkama i da mora biti pravno lice. Ovo je sada sigurno najteža oblast, ne samo u općini Ilijaš, nego i u Kantonu Sarajevo i tu težinu ili teškoću prave neke firme, a jedna od najvećih koje prave to jeste upravo IG Banja Luka koja ima potpuno pravo da se javi i da dobije, jer ispunjava sve uslove. Međutim, ona se javlja pod uslovima, mislim da je sada bilo 0,2% vrijednosti investicije. Dakle, mizerni novci, a naravno onda iz toga proizilazi mizeran nadzor. Ovo općine u Kantonu Sarajevo još uvijek nisu uspjele riješiti kako da se odbranimo, jer su konsultirane i Agencije za javne nabavke i sve

institucije koje se bave time. Mi smo sada u poziciji da za nekih par mjeseci nama ističe ovaj Ugovor sa IG Banja Luka, raspisujemo novi i ne znamo kako se ograditi da dobijemo ozbiljniji nadzor po Zakonu o javnim nabavkama. Ono što smo se mi snalazili ovdje kada je u pitanju IG Banja Luka, jeste da su više bile aktivirane naše Službe i da su ljudi tamo nadzirali i gledali, ali zaista to nije dovoljno i ja vam ovdje prenosim jednu objektivnu situaciju, zapravo kakva jeste. Također, pitanje pravednosti sredstava, ako iko traži da se opravdaju sredstva, a to znaju sva udruženja koja su vezana za Službu za društvene djelatnosti, to traži moja pomoćnica i tu nema nikakvog spora.

Pitanje vezano za stanove, veći broj stanova još uvijek vodi Uprava za stambena pitanja Kantona Sarajevo. Ono što mi imamo na raspolaganju i dalje dajemo po Ugovoru na šest mjeseci, produžavamo i to je jedna grupa socijalno ugroženih ljudi. Ja sam praktično i naslijedio jedan broj tih korisnika i praktično održavam te koji jesu. Negdje gdje se pojavi neki stan, a mislim na listi za te stanove je negdje cca 170 porodica koje čekaju. Izabere se najugroženija porodica i pravi se Ugovor o privremenom korištenju dok se ne donesu neki akti gdje se može trajno riješiti kada je u pitanju ovaj stamben fond kojim mi raspolažemo.

MUHAMED HANDŽIĆ – vijećnik BPS-Sefer Halilović

Hvala načelnice na obrazloženju svega. Međutim, samo se ne slažem sa ovim nadzorom o kojem govorite. Znamo mi za Zakon o javnim nabavkama i da se najpovoljniji uvijek bira, ali postavlja se pitanje koliko je taj najpovoljniji uradio posla. Mi tu možemo biti ključni i da nakon obavljenog uviđaja, odnosno kontrole radova koju on vrši, napravimo primjedbu i napravimo mu tužbu, pa da dobije više kazne nego što je primio zato što je potpisao. Znamo u većini slučajeva da ljudi potpišu, a da ne znaju gdje je dionica na kojoj treba da rade taj put. Takve, koji nam se prijavljuju na tendere, treba tužiti da on plati sve ono što nije dobro urađeno, a bude i toga. Vjerujte da se onda takvi neće prijavljivati.

Pitanje vezano za kanalizacije, deponije đubrišta ovih pilićara, ja ću vam donijeti slike na sljedeću sjednicu Vijeća i biće moje pitanje kada će to riješiti. Tražit ću da na lice mjesta izađe komunalni inspektor i tražit ću Izvještaj od inspektora kakve je mjere preduzeo. Ovim se ljudima ne smije ništa, oni su zaštićeni ko medžedi. Oni truju narod po Ilijašu. Ako se tome ne suprotstavimo mi, sistemski, u nas narod gleda, onda nema povjerenje u Vijeće. Ono što ste rekli da je Ilijaš najbolja općina u Kantonu Sarajevo, slažem se, i najviše se uradilo u posljednjih 5-6 godina. Trebamo se ugledati na još bolje od nas i težiti ka tome. I Vijeće i mislim na sve kolege i ostale da se slažu da je općina Ilijaš i administracija u općini Ilijaš najjača u tom smislu da radi svoj posao. Imate svaku pohvalu sa te strane, ali ovome se moramo suprotstaviti. Ovo je donekle kriminal, ne koji mi proizvodimo, nego koji proizvodi sam sistem donošenjem Zakona o javnim nabavkama.

SEMIR DEDIĆ – vijećnik SDA

U Zakonu o javnim nabavkama ima milion propusta i tu su više zaštićeni ponuđači, nego ugovorni organi. Npr. Makedonija ima najuređeniji sistem na Balkanu i u cijeloj Evropi. Većina od njih uzima modele, mi uzimamo dio, jer ne možemo ga cijelog implementirati, ali oni imaju crnu listu ponuđača. Ukoliko je neki izvođač imao npr. 5-10 prijava od ugovornih organa, on se stavlja na crnu listu i on npr. 5 godina ne može sklapati ugovore, ali to kod nas još uvijek nema. To će nama biti bolna tačka još mnogo godina, a do tada se moramo zaštićivati isključivo kroz tendersku dokumentaciju. Ko nama dodjeli nadzor, odnosno općini, mi na to ne možemo uticati. To je tako kako je, ali će valjda biti bolje u budućnosti.

Diskutanata po ovoj tački dnevnog reda više nije bilo, pa je Općinsko vijeće jednoglasno usvojilo

Izveštaj o radu općinskog načelnika i službi općine Ilijaš za 2018. godinu

AD-5

Operativni plan općinskog načelnika i službi općine Ilijaš za 2019. godinu

AKIF FAZLIĆ – općinski načelnik

Bit ću kratak. Operativni plan je transparentan, razrađen po službama, djelatnostima, po rokovima, analitički i vi ste na određeni način dali osnovnu saglasnost kroz usvajanje Budžeta za 2019. godinu. Dakle, ovo je jedna detaljna razrada. Prije nego što dam kratak osvrt na ovaj Plan, vama sugerišem, ako ima nekih ozbiljnijih projekata koji smo možda izostavili i koji bi se trebali naći u ovom Operativnom planu, da to pripremimo za rebalans i Budžeta i ovog Plana koji ja očekujem polovinom ove godine, jer i Vlada Kantona Sarajevo najavljuje rebalans Budžeta Kantona Sarajevo kroz koji, nada se, biće pozicionirani još neki projekti koji su važni za našu općinu. Osvrnut ću se samo na nekoliko značajnih velikih projekata i mi ovim projektima zaista snažno dalje idemo u izgradnju kako infrastrukture tako i pravimo jedan ozbiljan ambijent i s aspekta poslovnog ambijenta i generalno kada je u pitanju imidž naše općine. Dakle, u 2019. godini, ovo sve što je ovdje do zadnjeg zarez, stojim iza toga da ćemo završiti prvu fazu izgradnje vodoopskrbnog sistema Vrutak koji će značiti da će građani MZ Gajevi dobiti vodu iz ovog novog sistema i da će se stvoriti pretpostavke da se ova voda i u narednom periodu može dalje distribuirati i prema MZ Dragoradi i takođe prema Bijambarama. Spominjao sam već dom u Podlugovima koji jeste bio planiran kroz dvije godine i mislim da će za 2-3 mjeseca biti u potpunosti završen. Završetak rekonstrukcije taložnice koju smo započeli negdje pred kraj prošle godine sada je u fazi tenderska procedura i negdje u junu i do kraja jula će biti završen ovaj projekat. Izgradnja i opremanje fiskulturne sale u SŠC "Nedžad Ibrišimović" Ilijaš, tenderska procedura završena, praktično pripremljena sva dokumentacija i dozvole i očekujem najdalje za mjesec dana da izvođač radova uđe u ovaj projekat i da i on obzirom na objekat onakav kakav jeste može sigurno završiti za nekih 4-5 mjeseci, izgradnja Sportskog centra Ilijaš - izgradnja stadiona I faza, intenzivni su i započeti radovi na izgradnji I faze Sportskog centra – gradski stadion i također ova I faza treba da se završi do jeseni ove godine; sanacija i utopljanje područne škole u Gajevima – dakle potpuno opremanje te škole sa novim sistemom grijanja, sve što ulazi u energetske efikasnost; sanacija sprata vrtića u Ilijašu. Ovo sam namjerno stavio kao jedan od važnih projekata, finansijski nije toliko, nekih 80.000,00 KM, ali znamo da tamo imamo spiskove i redove i da sva djeca nemaju priliku da mogu koristiti ovaj vrtić i želimo na ovaj način da proširimo kapacitete; rekonstrukcija regionalne ceste na potezima (ovo je tačno prepisano iz Plana Direkcije za ceste Kantona Sarajevo koji je potvrdila i nova Vlada) Stari Ilijaš-Malešići, Alića rampa-Gnionica, Lješevo-prema granici Kantona, ali to će biti samo do područne škole i ovdje ja nisam upisao, ali stoji u Planu i rekonstrukcija mosta na Gnionici; nastavak daljnje modernizacija saobraćajne i vodovodne i kanalizacione infrastrukture na cijelom području općine (vidjeli ste detaljno u Operativnom planu o kojim se sve projektima radi); nastavak infrastrukturnog snabdijevanja industrijskih zona, intenzivno ulaganje i u zonu Željezara i u novu zonu Luka. Opremanje ovih zona donosi do nove izgradnje proizvodnih hala i pokretanja biznisa; izgradnja reciklažnog dvorišta (ovdje smo stavili I fazu), međutim mi smo i u službi i ovdje odlučili da ide na postupak potpunog projekta, a vidjet ćemo u fazi realizacije hoće li se on moći završiti cijeli u ovoj godini ili će morati fazno.

Također nastavljamo sa vrlo značajnim projektom kada je u pitanju revitalizacija Starog Grada Dubrovnika. Dakle, aplicirat ćemo, završit ćemo svu dokumentaciju i procedure koje su bitne za izgradnju ovog zida koji treba da povezuje južnu i istočnu kulu. Vrijednost tog projekta je cca 150.000,00 KM. Energetska efikasnost javnih objekata, prije svega, Vlada Kantona će, neovisno od općine Ilijaš, uraditi energetska efikasnost za objekat Policijske stanice Ilijaš i ambulantu Srednje, a mi ćemo, kao općina što smo potpisnici projekta sa Vladom i SERD-om, definisati objekte kolektivnog stanovanja i nadam se da ćemo u ovoj godini uraditi jedan broj tih objekata. Zgrada zemljoradničke zadruge u Srednjem koja nije realizirana u prošloj godini. Ovdje sam, osim onih stalnih projekata oko uređenja vodotoka naglasio dalje uređenje vodotoka rijeke Bosne između Kadaričkog mosta i Gnionice, jer je Agencija Slivovi rijeke Sava kroz svoj budžet obezbijedila 400.000,00 KM na daljnjem uređenju ovog poteza i ona je naravno implementator ovog projekta. Kroz Izvještaj sam govorio, ove godine počinjemo sa izlaganjem kada je u pitanju završetak procesa ovo što smo tehničke podatke radili, ovo što je katastar radio, da konačno ljudi budu upisani kao vlasnici i nađu se u gruntu i naravno ovo vezano za projektovanje za nove regulacione planove i za izradu novog urbanističkog plana za urbanističko područje općine Ilijaš su osnov aktivnosti naše općine sa detaljnom razradom kako ste to dobili u ovom dokumentu.

MIRSAD OSMANOVIĆ – vijećnik SDP-a

Prošli put sam postavio jedno provokativno pitanje načelniku, odnosno inicijativu da on i pomoćnici obuju čizme i obiđu Ilijaš. Zašto ovo govorim? Treba se van centra Ilijaša malo maknuti. Sramota je da imamo odavde 100-150 m puteve gdje ljudi žive, a moraju u čizmama ići. Jedan primjer – ulica Zlatnih ljljana. Kada se inače tiče razvoja i ulaganja, imam primjedbu, ali da ne dužim. Mi u SDP-u pripremamo jedan dokument, od početka ovog Vijeća, ravnomjerno ulaganje na području općine Ilijaš. Imat ćete taj dokument vjerovatno u aprilu na sjednici Vijeća. Kada se tiče ovog pitanja i dobro me je podsjetio kolega Dedić, mi imamo mogućnosti, imamo obavezu, kada su u pitanju javne nabavke vezano za izvođače radova i vezano za nadzor. To je obaveza, ako nismo izgubili certifikat. Ja sam često ovdje slušao pohvale poslije audita, da se to radi fantastično, da dobijamo dobre ocjene i to je fantastična prilika gdje su obaveze da ocjenjuju dobavljače posebno u ova dva segmenta. Dobro bi bilo da ocjenjujemo iz razloga jer malo koja općina u okruženju troši novaca na infrastrukturu kao općina Ilijaš. Međutim, moramo priznati da je jedan dio puteva za jednokratnu upotrebu i zato je jako važno ko je nadzor i ko su izvođači.

ALMIR ŠPIODIĆ – vijećnik BPS-Sefer Halilović

Za ovaj Operativni plan mogu se samo reći riječi hvale. Raduje me činjenica da su sve mjesne zajednice zastupljene kada je u pitanju putna infrastruktura i sve mjesne zajednice će, a vjerovatno su dostavile i prijedloge, koji su to prioriteti. Znači, raduje me činjenica da je obuhvaćeno sve što je potrebno da se radi na prostoru općine Ilijaš. Zsigurno ima stvari koje su izostavljene ili projekata koje nismo trenutno u mogućnosti da radimo, ali ne završava se život sa 2019. godinom. Treba ostaviti poslova i za 2020. godinu i ona je jako važna, pa za 2021., za neke buduće generacije da se dokazuju. Ovaj Operativni plan je jedan izazov za sve Službe općine Ilijaš koji treba realizovati u narednom periodu. Ako govorim sa aspekta lokal patriotizma, vrlo sam zadovoljan projektima koji će se realizovati u MZ Podlugovi. Ono što je možda primjedba, jesu rasvjetna tijela. Planirano je samo deset, a znamo da je MZ Podlugovi jedno vrlo urbano i veliko naselje gdje još uvijek ima uličica koje je potrebno osvijetliti. Te ulice građani koriste kao pješačke prolaze, a



znamo da je izgrađeno i zagrađeno sve što se moglo zagrađiti, ali bilo je i savjesnih građana koji su ostavili pješačke prolaze kako ljudi ne bi morali kružiti glavnim ulicama. Mislim da je te pješačke prolaze jako važno osvijetliti iz razloga što njima prolaze pretežno djeca do škole, građani koji idu do doktora itd. To je ujedno i nadopuna rasvjeta koja nije završena do kraja, a za sve ostalo mogu samo reći čestitam načelnice i nadam se da ćemo ovo realizovati do kraja godine.

MUHAMED HANDŽIĆ – vijećnik BPS-Sefer Halilović

Ja neću načelniku čestitati, obzirom da sam mu čestitao na Budžetu, a ovo je praktično Budžet razrađen po stavkama. Međutim, ima jedno pitanje u ovoj razradi. Načelnik je napomenuo uređenje korita rijeke Bosne od Kadaričkog mosta prema Stavnji i tu možda imamo jedan problem, a nije naznačen, vezano za imovinsko-pravne odnose. Ja imam informaciju da dole postoji ostrvo usred rijeke, što je meni nelogično, koje je u vlasništvu porodice Halilović. Usred rijeke da postoji ostrvo vlasništvo nekoga, ja to ne mogu da shvatim. Ako je to istina, vi ćete to potvrditi ili suprotno i na koji način ćemo to riješiti?

ALAN ŠERAK – vijećnik SDP-a

Mene zanima da li je Direkcija za ceste izvršila projektovanje ovih dionica, a tiče se rekonstrukcije regionalne ceste, posebno Alića rampa-Gnionica?

AKIF FAZLIĆ – općinski načelnik

Ovo što je uvaženi vijećnik Handžić kazao, to nama jeste veliki problem u realizaciji ovog projekta. Nažalost, da bi se realizirao projekat, nama je Agencija usloвила da riješimo imovinsko-pravne odnose. Logično bi i bilo "to je tvoj vodni pojas i to rješavaj". Znači mi moramo riješiti imovinske odnose kada je u pitanju Ada i moramo riješiti imovinske odnose od mosta do Meška koji su takođe neki drugi vlasnici. Ovo što je rađeno, bilo je vlasništvo općine i prošle godine nismo imali problem. Ovih 400.000,00 KM je predviđeno da se sada nastavi prema Gnionici i tu nas čeka ta Ada. Ta Ada je vlasništvo porodice Halilović i porodice Džafo. Dakle, to su dvije porodice, a oni su postali vlasnici kupovinom od prethodnih vlasnika. To je nekada i prije rata bilo vlasništvo, oni su to kupili i tako postali vlasnici. Isti slučaj imamo i u Podlugovima gdje je Muris Fazlić kupio od prethodnog vlasnika Adu čitavu i pretvorio je u plantažu. Što je tako, o vlasničkim pravima nećemo govoriti, nama nije jednostavno da riješimo ovo i imamo neke svoje ideje kako to rješavati i vi ćete sigurno biti informisani oko toga. Ako to ne uspijemo, nema projekta, ali uložiti ćemo sve da to riješimo.

Pitanje projektovanja, do nove godine nije bio urađen projekat ovog poteza, a moj zadnji sastanak je bio sa Direkcijom za ceste i ona je nama pokušavala da obavezu da mi radimo neke projekte i nije problem da mi radimo projekte, ali ljudi radi se o infrastrukturi kojom oni upravljaju i za koju mi ne znamo šta su tehničke performanse i šta je to kada je u pitanju regionalna cesta i tu se nismo dogovorili. Dakle, Direkcija mora raditi projekte. Također, projekat koji su uradili za Stari Ilijaš-Malešići, mi nismo zadovoljni tim projektom i mi ne damo građevinsku dozvolu za taj projekat, jer tim projektom koji je napravljen nije na najbolji način riješeno pitanje odvodnje površinskih voda, a znamo šta to znači za onu dionicu od Malešića do Starog Ilijaša. Dakle, sada smo se uključili da se to definitivno riješi i da odvodnja površinskih voda postane sastavni dio projekta rekonstrukcije regionalne ceste na tom potezu.

Ja bih na neki način volio da iniciram ukoliko je projektovanje u toku i ukoliko vi imate mogućnosti da utičete na sam projekat da svakako vodite računa da ovaj potez treba urbanizirati na način kako smo i razgovarali, a to je da obavezno idu trotoari sa obje strane i biciklistička staza. Nadam se da to neće ugroziti Regulacioni plan u nacrtu, a tiče se samog Banovca.

Što se tiče ovoga što je kolega Handžić rekao za ovo zemljište, sticajem okolnosti znam o čemu se radi, čovjek je kupio zemljište, iskoristio ga do maksimuma i bukvalno nije ostalo ništa osim vode, ali imamo obavezu da to otkupimo od njega. Ja se samo nadam načelnice da ćete voditi računa da to ne bude neka basnoslovna cifra. Vještak će procijeniti, ali mi ne trebamo pristati na neku vrstu ucjena. Ono zemljište je trenutno bukvalno bezvrijedno. Iskorišteno je do maksimuma, eksploatisalo se sve što se moglo eksploatisati i nekako mi je čudno da se to nama "gura" da to otkupimo kada je ono u potpunosti izgubilo na cijeni.

Diskutanata po ovoj tački dnevnog reda više nije bilo, pa je OV-e jednoglasno usvojilo

Operativni plan općinskog načelnika i službi općine Ilijaš za 2019. godinu

Uslijedila je pauza od 12:40-12:45 h.

AD-6

Izveštaj o izvršenju Budžeta općine Ilijaš za period 01.01.2018.-31.12.2018. godine

MERIMA OSMANOVIĆ – pomoćnica načelnika

Želim se zahvaliti za pohvale za rad općinske administracije za proteklu godinu. Ovaj Izveštaj je usko povezan sa Izveštajem o radu općinskih službi koji vam je prezentovao načelnik i oni se ustvari prožimaju jedan kroz drugi. Ovaj Izveštaj za izvještajni period 01.01.-31.12.2018. godine je ostvario prihode u iznosu od 16.985.000,00 KM, odnosno 90% od ukupno planiranih prihoda u Budžetu za 2018. godinu. Ostvareni izdaci su 14.156.000,00 KM ili 75% od planiranih izdataka. Prema tome, ostvaren je suficit u iznosu od 2.828.968,00 KM.

Kao obrazloženje suficita navela bih akumulirana sredstva institucija i građana, prvenstveno za realizaciju infrastrukturnih objekata na području općine Ilijaš i načelnik je to obrazlagao kroz svoj Izveštaj i kroz Operativni plan i ja ću ponoviti ovdje da se radi o projektima visoke vrijednosti kao što je izgradnja vodoopskrbnog sistema Vrutak, rekonstrukcija taložnice, rekonstrukcija saobraćajne infrastrukture u industrijskim zonama, prvenstveno Luke i Željezara "Ilijaš", zatim sredstva namijenjena za izgradnju gradskog stadiona sa pratećim sadržajima, izgradnja fiskulturne sale u SŠC "Nedžad Ibrišimović", sredstva za izgradnju spomen kompleksa u Misoči. Dakle, sve su to sredstva koja su u Budžet uplaćena negdje pred kraj godine iz Budžeta Kantona Sarajevo za 2018. godinu i napomenula bih da je za gotovo sve ove projekte provedena procedura javnih nabavki, izabrani su izvođači, zaključeni ugovori, neki su u fazi realizacije, ali su neki prekinuti iz razloga građevinske sezone i nastavak slijedi sa lijepim vremenom, odnosno sa nastupajućom građevinskom sezonom. Porezni prihodi u ovom izvještajnom periodu ostvareni su u iznosu od 5.180.330,00 KM ili 98%. Najvećim dijelom to su prihodi od indirektnih poreza koji pripadaju jedinicama lokalne samouprave, prihodi na ukapljeni plin, prihodi od poreza na promet nepokretnosti i prava itd. Što se tiče neporeznih prihoda oni

su ostvarni u iznosu od 67% ili 2.052.000,00 KM, a to su prihodi od imovine, administrativne i komunalne takse, pružanja javnih usluga itd. U protekloj godini od Federacije BiH imali smo tekući transfer od 150.000,00 KM u svrhu pomoći Budžetu općine Ilijaš. Tekući transferi od Kantona Sarajevo su ostvareni u iznosu od 606.519,00 KM i to su uglavnom namjenska sredstva namijenjena za prevoz učenika osnovnih i srednjih škola, za dopunska prava boraca, a odnose se na isplatu dječijeg dodatka i naknade u slučaju smrti članova boračke populacije. Kapitalni transferi od ostalih razina vlasti ostvareni su u iznosu od 5.862.370,00 KM i oni su detaljno prikazani kroz Izvještaj i ja ne bih pojedinačno to obrazlagala. Što se tiče rashodovne strane Budžeta, imamo sredstva za rad organa uprave koji su ostvareni u iznosu od 1.776.744,00 KM odnosno 90% i sredstva za naknade uposlenim u iznosu od 80%, izdaci za materijal i usluge u iznosu od 901.561,00 KM ili 78%. ovdje bih izdvojila i tekuće transfere drugim nivoima vlasti uglavnom za rad JU "KSC i Radio Ilijaš", izdaci za Dan općine, za rad Zemaljskog muzeja itd. Tekući transferi neprofitnim organizacijama ostvareni su u iznosu od 636.644,00 KM. Uvećani su za 11% u odnosu na prošlu godinu. Detaljnu analitiku imate kroz Izvještaj. Ovdje je vidljivo koliko je općina podržavala rad svih udruženja, a koji egzistiraju na području općine Ilijaš. Ono što zavređuje posebnu pažnju u svakom slučaju je kapitalni dio Budžeta gdje su realizovani brojni projekti i zbog javnosti iznijela bih samo podatak da je kapitalni Budžet realizovan u iznosu od cca 9.000.000,00 KM tako da su realizovani brojni projekti, a načelnik je detaljno iznio kroz svoj Izvještaj o kojim projektima se radi. Dakle, građani su i kroz ovaj Budžet dobili veliki broj infrastrukturnih objekata i na taj način se poboljšao život u našoj zajednici.

Diskutanata po ovoj tački dnevnog reda više nije bilo, pa je OV-e jednoglasno usvojilo

Izvještaj o izvršenju Budžeta općine Ilijaš za period 01.01.2018.-31.12.2018. godine

#### AD-7

Prijedlog Odluke o kreditnom zaduženju za izgradnju Gradskog stadiona Ilijaš  
sa pratećim sadržajima

ALAN ŠERAK – vijećnik SDP-a

Treba da se zadužimo za jedan ne mali iznos za izgradnju ovog stadiona. Sa neke strane ja to i podržavam. Međutim, volio bih da se vijećnicima napravi neka vrsta mini prezentacije da mi uistinu vidimo o čemu se tu radi i kakav je to projekat izgradnje budućeg stadiona. Smatram da smo to na neki način morali vidjeti, jer ako trebamo sada donijeti Odluku da se zadužimo 1.200.000,00 KM, svakako smo trebali da budemo upoznati sa tim budućim sportskim kompleksom, jer ovako dati paušalno podršku nečemu, a u biti ne znamo šta će to u konačnici biti, mislim da ne bi bilo baš najkorektnije. Ako imate nešto pripremljeno, volio bih da to vidimo.

MUHAMED HANDŽIĆ – vijećnik BPS-Sefer Halilović

U svakom slučaju velika podrška za izgradnju sportskog kompleksa na ovom našem stadionu. Ovo je gradski stadion, koliko ja znam, i nije stadion nikakvog fudbalskog kluba. Znači, upravitelj je općina, koliko ja znam. Ovo sve govorim zbog dezinformacija koje kruže gradom da je to stadion fudbalskog kluba i menadžmenta tog fudbalskog kluba, da su oni obezbjedili sredstva da se stadion radi, koliko su oni sposobni što su se pojavili tu. Ja to ne mogu da vjerujem. Ovo je sigurno naš projekat, projekat općine. Ovom projektu u

svakom slučaju treba dati podršku i ovo što Alan traži, trebalo nam je to biti na stolovima već davno. Još što nedostaje, a ja imam informaciju, jeste da nemamo atletsku stazu. Naši atletičari, i svi oni koji se bave ovom vrstom sporta, će morati ponovo ići u Sarajevo da treniraju, umjesto da iz Sarajeva nama dolaze zbog kapaciteta, jer i oni sami nemaju toliko prostora gore. Znači, pored stadiona koji će lijepo izgledati za ovoliko sredstava, predlažem da se u sklopu njega, ako je moguće, uradi aneks i da nam menadžment tog fudbalskog kluba obezbjedi sredstva o kojima pričaju da su oni obezbjedili da uradimo i atletsku stazu sa tartan podlogom.

ALMIR ŠPIODIĆ – vijećnik BPS-Sefer Halilović

Diskusija kolege Handžića je opravdana i jednim dijelom je rekao ono što sam mislio ja reći. Otprilike, mi smo informisani od lokalnih medija i portala, pa putem i medija koji mi u cjelosti i finansiramo. Mislim da su te informacije na neki način dezinformisale javnost o investitoru na stadionu. Krajnje je nekorektno da se od strane medija, kažem ovih koje mi smatramo ozbiljnijim i relevantnim, one koje finansiramo, da takve vrste informacija i plasiraju. U potpunosti podržavam i raduje me činjenica da ćemo u nekom periodu imati taj uređeni stadion, taj sportski kompleks gdje ćemo moći da uživamo u toj predstavi koju nam priređuju sportski radnici i sportski takmičari. Što se mene lično tiče, nekorektno je bilo u proteklom periodu da se spominje taj jedan klub, a znamo da u Ilijašu postoje dva kluba koja se takmiče u istom rangu. Neko je to na početku počeo da svojata ono što mu ne pripada. Nadam se da će se ta greška u narednom periodu ispraviti i stadion ne pripada samo fudbalerima, jer tu imamo i atletičare i tu se mogu organizovati i druge sportske discipline tako da me raduje činjenica da ćemo u nekom narednom periodu imati to nešto što nam može donijeti bolji imidž općini, što nam može doprinijeti razvoju sporta i na kraju krajeva možda neku ekonomsku korist ukoliko budemo znali dobro iskoristiti taj potencijal koji ćemo stvoriti.

AKIF FAZLIĆ – općinski načelnik

Mi smo ovaj projekat davno započeli, prije godinu dana, a možda i više. Vi znate da je on kandidovan za Budžet Kantona Sarajevo za 2018. godinu. Dakle, radili smo na tome da obezbjedimo inicijalna sredstva za ovaj projekat. U prošloj godini uspjeli smo sa tadašnjom Vladom napraviti da se obezbjedi 500.000,00 KM. To smo obezbjedili na bazi projekta koji je urađen i u taj projekat su bile uključene tri službe, Služba za saobraćaj, stambeno-komunalne poslove i građenje, Služba za društvene djelatnosti i poslove mjesnih zajednica i Služba za prostorno uređenje i zaštitu okoliša. Taj projekat smo gledali kao nastavak daljeg razvoja ovog grada i njegovog urbanističkog uređenja. Kada vi gledate od ove zgrade općine, pa pješačka zona, pa trg, škole, sportske dvorane, javna tržnica i dolazimo do gradskog stadiona. Sve ove projekte koje smo radili željeli smo da oni budu baš projekti na nivou. Zato želimo da i ovaj stadion upravo bude šlag i da bude pravi projekat po kome će se prepoznavati i pričati o Ilijašu u kojem postoji taj stadion. To nas je navelo i razlog koji je tamo bio to je da tamo nismo imali ništa. Imali smo neuslovne ruševne prostorije, nikakve tribine i praktično je to značilo da pravimo novi stadion, odnosno novi objekat. Sada o proceduri. Znači da postoji Regulacioni plan Banovac, znate da smo pokrenuli izmjene i dopune Regulacionog plana Banovac, da smo za realizaciju ovog projekta i ne samo ovog nego i projekta fiskulturne sale u OŠ "Hašim Spahić" i sada fiskulturne sale u SŠC "Nedžad Ibrišimović" donosili Odluke o izuzeću. Kada se pokrenu izmjene nema davanja dozvola i to izuzeće je napravljeno samo za prostor izgradnje objekta tribina i ovih popratnih sadržaja, svlačionica i onih prostora. Sve drugo je ostalo sada čisto, sve drugo

je onako kako smo Nacrt Regulacionog plana, Izmjene i dopune ovdje usvojili i sve drugo će biti predmet rasprave kada on dođe ovdje, možda za mjesec, a najdalje dva, prijedlog Izmjena i dopuna Regulacionog plana Banovac. Mi smo od Zavoda, ja i Služba za prostorno uređenje, tražili da taj prostor, svo ono zemljište, teren, ostavi i definiše tako da ga mi možemo definisati shodno potrebama, a to znači da se pitanje atletske staze može definisati i uz glavni teren ako kažemo da treba da ide uz glavni teren ili želimo da imamo nogometno igralište ovako kako se u Evropi pravi bez toga, a da atlešku stazu napravimo uz pomoćni teren za koji smo se kandidirali prema Nogometnom savezu. Od toga neće biti ništa u I fazi, ali smo obezbjedili sredstva. Dakle, pitanje atletske staze je pitanje samo definiranja hoćemo li je postaviti uz glavni teren uz tribine ili uz pomoćni teren. Ta odluka je na nama, na ovom Vijeću, kada dođemo sa Izmjenama Regulacionog plana Banovac. Dakle, mi to donosimo i glasamo kroz donošenje dokumenta. Donijet ćemo odluku i jedna i druga varijanta ima svojih prednosti i mana. Za šta se odlučimo biće tako. Ovo upravo treba da bude jedan potencijal i sigurno će biti potencijal u daljem razvoju Ilijaša. Znamo kada smo započinjali pješačku zonu da je bilo skeptika, raznih anonimnih pisama itd., a pješačka zona je dovela do preporoda Ilijaša, dovela je mnoge ljude da ulazu u ovaj grad, da investiraju u Željezari ili Luci. I ovaj projekat ja vidim kao takav koji će dovesti sportiste i dalje širiti lijepu priču o Ilijašu. Što se tiče prezentacije projekta, možete donijeti Zaključak iako je on prezentiran kada je Vlada imala sjednicu ovdje u Ilijašu. U avgustu prošle godine prezentiran je na mnogim mjestima, a na Vijeću vjerovatno nije, ali dajte Zaključak, mi imamo projektnu dokumentaciju da se prezentira. Mi smo slike već postavili, sliku stadiona kako izgleda stavili na Trg, jer smo napravili novu kartu, novi pano i on će takav biti.

Obzirom da nam kredit uskoro ističe, još su ostale tri rate, pred donošenje Odluke i provođenje procedure o javnim nabavkama, izbor banke koja će dati najbolje uslove sigurno zahtjeva jedno vrijeme i neka terminski postavljena aktivnost je možda da u junu imamo ta odobrena sredstva i kroz ovih 500.000,00 KM od Vlade Kantona Sarajevo i ovim sredstvima mi smo zaokružili tu I fazu izgradnje ovog objekta. Dakle, mi smo ovu Odluku praktično donijeli kroz usvajanje Budžeta. Vi ste vidjeli tu poziciju i ova Odluka ne bi danas mogla biti predmet rasprave da nije pozicionirana u Budžetu. Dakle, definisali smo namjenu, a ovom Odlukom ćemo definisati i uslove i ako zaista ima potrebe za još nekim detaljima, ali zamolio bih vas da danas donesemo ovu Odluku da ne gubimo mjesec dana. Vi znate da ovih 500.000,00 KM koji su već uplaćeni u naš Budžet, radovi su počeli tako da obezbjedimo jedan kontinuitet da ono što sam i govorio kada je Operativni plan u pitanju da ovu I fazu završimo do kraja ove godine.

HALID DIZDAREVIĆ – vijećnik SDA

Zaista je dobro što se diskutovalo po pitanju ove Odluke i razumijem prethodnike koji su diskutovali po pitanju ove Odluke i ujedno pozdravljam Odluku o kreditnom zaduženju za izgradnju gradskog stadiona. Koliko sam shvatio, a bio sam i ranije već upoznat, ovo je samo faza ovog projekta koja će se realizovati i dobro je da je načelnik rekao da na prateće sadržaje mi možemo direktno uticati. Prateći sadržaji nisu samo atletska staza. Ona je samo dio pratećeg sadržaja, a također moram napomenuti da općina Ilijaš je općina koja uvijek daje dobre sportiste. U to ime mogu navesti osnovne i srednju škola stalno osvajaju prva mjesta na kantonalnom takmičenju iz atletike. Dakle, atletska staza nam je neophodna. Na atleškoj stazi sve osnovne škole vrše testiranje itd. Ja sam usmeno djelovao amandmanski pomoćnici načelnika za jedan teniski teren, jer smo mi jedina općina u okolini koja nema teniskog terena na otvorenom i zaista nam je neophodan. Siguran sam da dole ima dovoljno prostora za sve ovo, jer smo mi, kao

općina, otkupili dio zemljišta. Dakle, sve te prateće sadržaje mi možemo i trebamo iskoristiti, jer će se u projekat uložiti cca 5.000.000,00 KM. Znači, trebamo imati sportsko-rekreativni centar koji će biti na jednom zavidnom nivou

AKIF FAZLIĆ – općinski načelnik

Da ne ostanem dužan obzirom da je bilo puno komentara vezano za medijsko predstavljanje ovog projekta. Vjerujte, nije ni meni baš bilo pravo kako se to predstavljaju projekti, ali vi svi znate moj karakter tolerancije. Ovo je potpuno jasno. Ovo je objekat u vlasništvu općine Ilijaš. Gradski stadion će imati isti status kao što ima sportska dvorana, kao što ima KSC. Dakle, upravljat će općina Ilijaš, korištenje svim sportistima sa ove općine i tu nema nikakvih dilema. Ono kada je u pitanju prezentacija i ko se kako prezentirao to neću dalje komentarisati.

ALAN ŠERAK – vijećnik SDP-a

Obzirom da se ulažu ogromna finansijska sredstva nama uistinu ne treba sportski objekat koji je namijenjen samo za jedan sport. Mi nismo općina koja će se baviti samo jednom vrstom sporta i svakako da taj stadion treba da bude višefunkcionalan na kojem se mogu održavati neki dodatni sportovi. Što više to bolje. Drago mi je da sam čuo da će njime upravljati općina Ilijaš i to je već naznaka da ćemo mi pristupiti Izmjeni Odluke koju smo nekada davno donijeli da upravljanje stadionom dajemo Nogometnom klubu Ilijaš i oni definišu tamo neke cjenovnike, oni ga održavaju itd. Ja mislim da je vrijeme sazrelo nakon investicionog ulaganja u ovaj objekat, da mi bukvalno sjedemo i vidimo na koji način da povjerimo nekome upravljanje tim objektima. Ja mislim da ono što ima općina Centar koja ima Centar za sport i rekreaciju, po meni, to je fino riješeno. I mi imamo Kulturno-sportski centar i on treba da upravlja tom vrstom objekata, dakle, dvorana, stadion i ovo ostalo što će biti. KV SDP-a će podržati ovu Odluku, iako sam volio uistinu da vidim kako će izgledati taj stadion iz razloga kada se i u prethodnom sazivu Vijeća usvajala Odluka o kreditnom zaduženju, a tiče se našeg šetališta, bila je upriličena prezentacija tog projekta. Trebali se to nama na neki način ovdje predstaviti, ali eto vjerovat ćemo vam na riječ i ja se nadam da će to biti objekat koji će dugo, dugo godina služiti budućim generacijama općine Ilijaš.

Diskutanata po ovoj tački dnevnog reda više nije bilo, pa je OV-e jednoglasno donijelo

Odluku o kreditnom zaduženju za izgradnju Gradskog stadiona Ilijaš sa pratećim sadržajima

AD-8

Prijedlog Odluke o dodjeli na upravljanje i korištenje sistema za video nadzor gradskog područja općine Ilijaš

Diskutanata po ovoj tački dnevnog reda nije bilo, pa je OV-e jednoglasno donijelo

Odluku o dodjeli na upravljanje i korištenje sistema za video nadzor gradskog područja općine Ilijaš

AD-9

Prijedlog Odluke o poništenju Odluke Općinskog vijeća Ilijaš broj 01/1-02-947-5/18 od 26.04.2018. godine

Diskutanata po ovoj tački dnevnog reda nije bilo, pa je OV-e jednoglasno donijelo

Odluku o poništenju Odluke Općinskog vijeća Ilijaš broj 01/1-02-947-5/18 od 26.04.2018. godine

AD-10

Prijedlog Odluke o načinu i uslovima prodaje neizgrađenog građevinskog zemljišta

Diskutanata po ovoj tački dnevnog reda nije bilo, pa je OV-e jednoglasno donijelo

Odluku o načinu i uslovima prodaje neizgrađenog građevinskog zemljišta

AD-11

Prijedlog Rješenja iz imovinsko-pravne oblasti broj:06/1-31-248/19

Diskutanata po ovoj tački dnevnog reda nije bilo, pa je OV-e jednoglasno donijelo

Rješenje iz imovinsko-pravne oblasti broj:06/1-31-248/19

AD-12

Prijedlog Zaključka kojim se odobravaju novčana sredstva u iznosu od 30.000,00 KM na ime pomoći licima koja se nađu u stanju socijalne potrebe, a svoja prava ne mogu ostvariti putem Službe socijalne zaštite općine Ilijaš

Diskutanata po ovoj tački dnevnog reda nije bilo, pa je OV-e jednoglasno donijelo

Zaključak kojim se odobravaju novčana sredstva u iznosu od 30.000,00 KM na ime pomoći licima koja se nađu u stanju socijalne potrebe, a svoja prava ne mogu ostvariti putem Službe socijalne zaštite općine Ilijaš

Nakon što je iscrpljen dnevni red, predsjedavajuća Alma Omerović zaključila je dvadesetosmu sjednicu OV-a Ilijaš u 13:15h.

Zapisničar:  
Maida Habibović

PREDSJEDAVAJUĆA  
OPĆINSKOG VIJEĆA ILIJAŠ

---

Alma Omerović, BA nov.

\*\*\*\*\*  
Ul. 126. ilijaške brigade br. 6, 71380 Ilijaš  
Tel. ++387 33 580-620, 580-698, fax. 400-505,  
Transakcijski račun kod VAKUFSKE BANKE,d.d. Sarajevo:1602000000710645  
e-mail [ov@ilijas.ba](mailto:ov@ilijas.ba)  
certifikat:CRO20063Q

